

**KANTONALNA
PRIVREDNA
KOMORA TUZLA**

**BROJ 3-4/22,
mart, april
2022. godine**

KOMORSKI INFORMATOR



**AMBASADOR PAKISTANA U
POSJETI KOMORI TUZLA**



**PREDSTAVNICI EKONOMSKOG
ODJELA AMBASADE SAD U
KOMORI**



**AMBASADOR RUMUNJE U
POSJETI KOMORI TUZLA**



**KVALITENIJA SARADNJA
MINISTARSTAVA I PRIVREDNIH
KOMORA**



Komorski informator

Uvod

Poštovani čitaoci!



Još jedan period koji karakteriše veliki broj aktivnosti u Kantonalnoj privrednoj komori Tuzla.

Ono što se može izdvojiti jeste veliki broj protokolarnih posjeta u Komori, još jedan zapažen nastup na značajnoj sajamskoj manifestaciji, aktivnosti na međukantonalnoj saradnji, partnerski status u kvalitetnoj kampanji koju provodi MUP TK. Krenut ćemo redom...

- U nastupnoj posjeti Kantonalnoj privrednoj komori Tuzla, boravio je ambasador Pakistana, N.J.E. Akhtar Jamil Raoa.
- U okviru završnih aktivnosti trogodišnjeg mandata, u dvodnevnoj posjeti Tuzli boravio je Ryan Miller ekonomski službenik Ekonomskog odjela Ambasade SAD u BiH.
- Delegacija Ambasade Rumunije u BiH u okviru svojih redovnih aktivnosti u Bosni i Hercegovini posjetila je Kantonalnu privrednu komoru Tuzla. N.J.E. Anton Pacuretu ambasador Rumunije u BiH u pratnji Andreia Gliscae prvog sekretara Ambasade Rumunije u BiH razgovarali su sa Nedretom Kikanovićem i njegovim saradnicima.

Zajedničko ovim susretima jeste razgovor o aktuelnim odnosima zemalja, privrednim tokovima, mogućnosti za unaprjeđenje saradnje...

- U Beogradu je održan 43. Međunarodni sajam turizma na kojem je učestvovalo više od 350 izlagača iz više od 25 zemalja svijeta. I ove godine, na jednoj od najznačajnijih sjamskih manifestacija iz oblasti turizma u ovom dijelu Evrope, nastupila je i Kantonalna privredna komora Tuzla. Ove godine, u saradnji sa Turističkom zajednicom Grada Tuzla i članicama Udruženja za trgovinu, ugostiteljstvo i turizam te Udruženja turističkih agencija, Komora je pripremila i jednu novost. Riječ je o afiši, svojevrsnom pozivu turistima da posjete Panonska jezera, Tuzlu, Tuzlanski kanton, koji nudi paket ponudu i prijedlog, šta posjetiti, vidjeti prilikom boravka u Tuzli, kako provesti jedan ili više dana.

- Uprava policije Ministarstva unutrašnjih poslova Tuzlanskog kantona u saradnji sa Kantonalnom privrednom komorom Tuzla provodi javnu kampanju „Borba protiv kompjuterskog kriminala“.

- Kantonalnu privrednu komoru Tuzla posjetila je Azra Sinanović ministrica Ministarstva za rad, socijalnu politiku i izbjeglice Zeničko-dobojskog kantona sa saradnicima.

- Sastanku je prisustvovao Nurdin Muhamedbegović pomoćnik ministra za rad i zapošljavanja, pravnih općih i ekonomskih poslova u Ministarstvu za rad, socijalnu politiku i povratak Tuzlanskog kantona. Povod za ovaj sastanak bili su razgovori o načinima nastavka i mogućnostima unaprjeđenja saradnje resornih kantonálnih ministarstava i kantonálnih privrednih komora Zenica i Tuzla.

Uz pomenuto, tu je i niz drugih aktivnosti vezanih za firme članice Komore, za veliki broj sastanaka, prijema, posjeta privrednicima koje su upriličili ministri u novoj Vladi Tuzlanskog kantona na čelu sa novim premijerom...

Za očekivati je da je ovo dovoljno informacija da čitaocu učine interesantnom i korisnom novinu „Komorski informator“...

Dino Kalesić
gl. i odg. urednik

Komorski informator

Sadržaj

KANTONALNA
PRIVREDNA
KOMORA TUZLA

KOMORSKI INFORMATOR
BROJ 3-4/22,
mart-april
2022. godine

IZDAVAČKI SAVJET:

1. Nedret Kikanović, član
2. Mirsad Kukić, član
3. Izet Džananović, član
4. Suad Selimović, član
5. Edina Kurtić, član

REDAKCIJSKI KOLEGIJ:

1. Nedret Kikanović, član
2. Almir Mešić, član
3. Edina Kurtić, član
4. Suad Selimović, član

IZDAVAČ:

Kantonalna privredna
komora Tuzla

GL. I ODGOVORNI UREDNIK:

Dino Kalesić

TEHNIČKA PRIPREMA, REPRO I ŠTAMPA:

GRIN d.o.o. Gračanica

ZA ŠTAMPARIJU:

Hariz Altumbabić, direktor

TIRAŽ:

500 primjeraka.

ADRESA:

Trg slobode bb
e-mail: kpktz.ba@bih.net.ba
<http://www.kpktz.ba>

	Ambasador Pakistana u posjeti Komori Tuzla	4
	Predstavnici Ekonomskog odjela Ambasade SAD u Komori	5
	Ambasador Rumunije u posjeti Komori Tuzla	6
	Održane sjednice UO i Skupštine Komore	8
	„Partnerski pristup lokalnom razvoju Tuzla“	8
	„Borba protiv kompjuterskog kriminala“	9
	Kvalitenija saradnja ministarstava i privrednih komora	10
	Privreda TK na Sajmu turizma u Beogradu	11 i 12
	Press konferencija – Analiza stanja privrede TK 2021	13, 14, 15 i 16
	Privreda TK na sajmu u Banjaluci	17
	Najava sajamskih manifestacija	17 i 18
	„Sigurno rukovanje hranom i kako do oznaka geografskog porijekla i/ili halal sertifikata“	19
	Usavršavanje za NO i UO, prijave za novu grupu	20
	„Maestro Suits“ brend firme „Kismet „ d.o.o	27



Ambasador Pakistana u posjeti Komori...

Jačati saradnju TK, BiH i Pakistana

Omogućavanje boljeg i bržeg procesa izvoza i uvoza između TK, BiH i Pakistana, dogovoreno je da se zajednički radi na povezivanju privrednika i jačanju poslovne saradnje



U nastupnoj posjeti Kantonalnoj privrednoj komori Tuzla, boravio je ambasador Pakistana, N.J.E. Akhtar Jamil Raoa. Visoku delegaciju iz ambasade Pakistana, koju su uz ambasadora sačinjavali saradnici Muhammad Khan i Mustafa Sarajlić i Mir Mukarem Zehri te počasni konzul za investicije pri ambasadi Pakistana, u Komori je na sastanku primio Nedret Kikanović predsjednik Kantonalne privredne komore Tuzla sa svojim saradnicima.

Predsjednik Kikanović je ambasadora Raoa upoznao o privrednoj strukturi Tuzlanskog kantona i aktuелnoj situaciji u privredi, aktivnostima koje poduzima Kantonalna privredna komora Tuzla.

“Vanjskotrgovinska razmjena između naše dvije zemlje je na niskom nivou i sigurno ima prostora za unapređenje. Naš cilj je pojačati vanjskotrgovinsku razmjenu, jer su do sada, uprkos dobrim odnosima dvije zemlje, i izvoz i uvoz bili na niskom nivou. Znali smo od ranije a i danas nam je uvaženi ambasador upotpunio informaciju, da je Pakistan zemlja koja ima jako puno sirovina kao što je pamuk. Pretpostavka je da u narednom periodu može doći do saradnje na uvozu proizvoda od pamuka te raznih ulja po kojima je Pakistan također poznat. Mi smo već bilježili određene aktivnosti kada je u pitanju izvoz u metalnom sektoru, iz Bosne i Hercegovine su se do sada izvozile mašine za štampanje. Intencija je da se izvoz takvih proizvoda poveća, a razgovaramo i tražimo mogućnost da stvorimo pretpostavke za izvoz drugih proizvoda koji su potrebni tržištu Pakistana, a u našoj zemlji ih ima dovoljno. To su neke stvari koje sa Pakistanom možemo napraviti, to bi trebale biti teme nekih narednih razgovora”, izjavio je Nedret Kikanović, predsjednik Kantonalne privredne komore Tuzla.

Ambasador Raoa je predsjednika Kikanovića i njegove saradnike upoznao sa privrednim potencijalima Pakistana. **“Bosna i Hercegovina i Pakistan imaju dobre odnose, ali i potencijal za dalju saradnju. Veoma sam zainteresovan za različite puteve do poboljšanja saradnje. Zajedno ćemo pronaći način pomoću kojeg možemo imati zajedničku**

korist. Smatram da postoji jaka potreba za direktnijim vanjskotrgovinskim odnosima, imajući u vidu da se većina dosadašnje razmjene odvijala posredstvom trećih zemalja. Tako bi proizvodi poput tekstila i kože iz Pakistana mogli naći svoje mjesto na tržištu u Tuzli a na sličan način bi se omogućio izvoz proizvoda, ponajviše uglja, iz Tuzle. Povjerenje koje smo međusobno izgradili je veoma jako, historijska pozadina je također jaka i trebamo graditi ove odnose posebno u poslovnom svijetu”, naveo je Akhtar Jamil Raoa ambasador Pakistana u BiH.



Kako se moglo se čuti na sastanku ambasadora Pakistana u BiH i predstavnika Kantonalne privredne komore Tuzla, na Sarajevo biznis forum u maju dolazi delegacija pakistanskih privrednika što je prilika za jačanje saradnje, posebno za investiranje u BiH znajući da već od ranije postoji interes pakistanskih privrednika. Gosti su posebno iskazali interes za poslovne zone u Tuzlanskom kantonu, za procedure i olakšice koje eventualno postoje za investitore. Na kraju sastanka koji je imao za cilj omogućavanje boljeg i bržeg procesa izvoza i uvoza između TK, BiH i Pakistana, dogovoreno je da se zajednički radi na povezivanju privrednika i jačanju poslovne saradnje Pakistana i Tuzlanskog kantona.

D.K.



Prijem u Komori...

“Uništava nas sporost donošenja odluka i zakona na državnom nivou”

Kantonalnu privrednu komoru Tuzla posjetili predstavnici Ekonomskog odjela Ambasade SAD u BiH, Ryan Miller ekonomski službenik i Edhem Branković specijalist za komercijalne poslove



U okviru završnih aktivnosti trogodišnjeg mandata, u dvodnevnoj posjeti Tuzli boravio je Ryan Miller ekonomski službenik Ekonomskog odjela Ambasade SAD u BiH. Delegacija Ambasade SAD u BiH koju je još sačinjavao Edhem Branković specijalist za komercijalne poslove, upriličila je posjetu Kantonalnoj privrednoj komori Tuzla. Istakao je na sastanku g. Miller, uz zahvalnost na prijemu, da mu je veoma značajna posjeta Tuzli. **„Prilika je ovo za sagledavanje cjelokupne situacije u privredi ovog kraja. Tu smo da se upoznamo sa ekonomijom, dešavanjima u privredi, izazovima, posljedicama pandemijske krize. Već smo upriličili nekoliko susreta. Posjetili smo Američki kutak u Narodnoj i univerzitetskoj biblioteci “Derviš Sušić” Tuzla, Međunarodni aerodrom Tuzla, Virgin Pulse Tuzla. Od velikog značaja je da na kraju trogodišnjeg mandata saznam i više podataka o privrednim kretanjima a Komora je pravo mjesto za sagledavanje kompletne slike”,** izjavio je Ryan Miller. Kako je istakao Edhem Branković specijalist za komercijalne poslove, provode ugodne trenutke u Tuzli imaju prijatelne susrete i razgovore. **“Imali smo priliku u hotelu “Sony Lux” Tuzla, koji je i član Komore, pročitati vaše novine “Komorski informator” iz kojeg smo dobili značajne informacije o vašim članicama. Informativna novina i o cjelokupnoj privredi Tuzlanskog kantona”,** pohvalio nas je g. Bičakić.

Nedret Kikanović je predstavio svoje saradnike a onda i kompletnu sliku privrednih kretanja na području Tuzlanskog kantona. Govorio je o strukturi privrede, uvozu-izvozu, poteškoćama sa kojima se privreda susreće. **“Ovaj kanton ima potencijala, ima značajne rezultate kada su u pitanju proizvodnja plastike, tekstil, obuća, drvna industrija, mašinska industrija, lideri smo u proizvodnji električne energije. Uglavnom je privredna izvozno orijentirana ka EU a značajani su i pokazatelji našeg izvoza namještaja u SAD. Znamo da postoje kapaciteti za napredak, za razvoj ali nas uništava sporost donošenja odluka i zakona na državnom nivou. Složenost prilika u BiH u značajnoj mjeri utiče i na privredu. Aktuелna globalna situacija se reflektira i na privredu TK. Iako je teško stanje, dobro se nosimo još uvijek, ali je neophodna podrška svih državih nivoa da se prevaziđu poteškoće u TK i cjelokupnoj bh privredi”,** izjavio je predsjednik Kikanović.

Predstavio je gostima iz Ambasade SAD i složenost komorskog sistema koji jedino na području FBiH funkcioniše na dobrovoljnom članstvu dok je u Vanjskotrgovinskoj komori, komorskom sistemu Republike Srpske, Brčko Distrikta obavezno članstvo kao što je slučaj i sa Obrtničkom komorom u BiH. **„Pripremljen je prijedlog novog Zakona i komorama, upućen na Vladu FBiH, u skupštinsku proceduru, gdje je „zaleđen“ već četiri godine”,** rekao je predsjednik Kikanović. Rečeno je na ovom skupu da Komorski sistem ulaže napore za stvaranje povoljnijeg privrednog ambijenta ali da to bez uticaja i pomoći, prije svega države, pa onda i vanjskih faktora, ipak nije dovoljno. Upućen je apel da se, s tim u vezi, pokuša naći način za kvalitetniju saradnju Komore sa agencijom USAID, kao što već postoji dobra saradnja sa drugim sličnim agencijama. Razgovaralo se o strukturi, aktuелnom momentu poljoprivredne i prehrambene industrije te djelatnosti turizma na području Tuzlanskog kantona sa posebnim osvrtom na sajamske nastupe koje Komora organizuje za članice u BiH i zemljama regije. Istaknuto je sastanku u Komori da je zajednički zadatak učiniti napore da se popravi privredna saradnja TK i SAD, da se unaprijedi odnos uvoza i izvoza a g. Miller se posebno interesovao za mogućnost povećanja uvoza koksa iz SAD u TK, stanje u MAT-u. Naglasio je spremnost da, na kraju svog mandata, prenese sva iskustva i saznanja svojim nasljednicima, da ambasadoru uputi prijedlog za više aktivnosti i djelovanja Ambasade na području TK, za veću saradnju sa Tuzlom i Komorom. Na kraju, gostima je saopćeno da je u pripremi sastanak privrednika sa područja Tuzlanskog kantona sa ambasadorom SAD u BiH.

D.K.



Prijem u Kantonalnoj privrednoj komori Tuzla...

Ambasador Rumunije u posjeti Komori Tuzla

„Sve što proizvedete, možete nama izvesti“



Delegacija Ambasade Rumunije u BiH u okviru svojih redovnih aktivnosti u Bosni i Hercegovini posjetila je Kantonalnu privrednu komoru Tuzla. N.J.E. Anton Pacuretu ambasador Rumunije u BiH u pratnji Andreia Gliscae prvog sekretara Ambasade Rumunije u BiH razgovarali su sa Nedretom Kikanovićem i njegovim saradnicima. Sastanak je iskorišten za razmjenu informacija o privrednim potencijalima i mogućnostima intenzivnijeg povezivanja poslovnog sektora Rumunije i Tuzlanskog kantona.

Kako su istakli gosti, ovom posjetom se želi, prije svega, razmotriti mogućnosti saradnje sa privredom Tuzlanskog kantona i Bosne i Hercegovine. Istaknuto je da su im svi sektori bosanskohercegovačke ekonomije interesantni, posebno u poljoprivrednom sektoru, IT i drugim industrijama, energetski sektor je zanimljiv, generalno, širok je spektar mogućnosti za saradnju.

„Jako sam zadovoljan i sretan što imam priliku posjetiti Tuzlanski kanton. Komora je prvo mjesto sastanka u ovoj posjeti. Želim saznati što je moguće više podataka o tome, čime raspolaže i Tuzlanski kanton i cijela BiH. Želim sagledati mogućnosti za unapređenje saradnje, ne samo na političkom planu jer imam dogovorene sastanke i u Vladi TK i u Gradu Tuzla, nego i na privrednom planu. Poznata mi je reputacija ovog grada, znam da je vodeći u BiH mnogim segmentima pa tako i privrednom razvoju a nadaleko su poznati i cijenjeni međuljudski odnosi, suživot, multikulturalnost koja krasi ovaj kraj“, rekao je N.J.E. Anton Pacuretu ambasador Rumunije u BiH na sastanku u Komori. „Saradnja sa BiH je do sada bila na zadovoljavajućem nivou a mi želimo da bude i bolja. Želimo raditi u obostranom interesu, želimo spoznati vaše potencijale, prenijeti to našim privrednicima. Ujedno, želimo poručiti da je Rumunija zemlja od 20 miliona stanovnika, pa sve što proizvedete, možete nama izvesti“, dodao je ambasador Pacuretu. Prema njegovim riječima, u pripremi je dolazak delegacije rumunskih privrednika u BiH, kako bi privrednicima omogućili da u direktnim kontaktima i razgovorima pronađu modalitete saradnje i ostvare nove poslovne iskorake.



„Jako smo zadovoljni posjetom Njegove Ekselencije te činjenicom da svoju posjetu Tuzlanskom kantonu počinje upravo u Kantonalnoj privrednoj komori Tuzla. Rumunija i BiH imaju izuzetno dobre odnose. Rumunija je važan trgovinski i bilateralni partner BiH. Prošle godine je trgovinska razmjena iznosila više od 400 miliona KM. Kada je u pitanju Tuzlanski kanton, izvozima raznih roba u vrijednosti od oko 25 miliona KM a u naš kanton stiže rumunske robe u vrijednosti oko 23 miliona KM. Izvezli smo značajne količine mašinskih uređaja, kotlova, namještaja a strukturu uvozne robe čine ambalaža, plastični proizvodi, živa stoka, voća i sigurno da postoji velik interes Rumunije za saradnju sa Tuzlanskim kantom. Također, postoji obostrana želja i opredjeljenje da se nastavi saradnja, podigne na viši nivo i da se omogući privrednicima što bolja i kvalitetnija saradnja“, istakao je Nedret Kikanović predsjednik kantonalne privredne komore Tuzla. Dogovoreno je da se u narednom periodu intenziviraju aktivnosti na značajnijem povezivanju privrednika, realizaciji zajedničkih projekata, kao i zajednički nastup na trećim tržištima.

Ambasador Pacuretu je na kraju ugodnog razgovora istakao mogućnost bratimljenja Tuzle i Tuzlanskog kantona sa gradovima i okruzima u Rumuniji. Također, naglašena je velika želja i potreba da se u što skorije vrijeme, stvore pretpostavke za povezivanje Kantonalne privredne komore Tuzla i njenih članica sa privrednim komorama u Rumuniji, državnom Privrednom komorom Rumunije te sa okružnim komorama kojih u Rumuniji ima 40. Sve u skladu sa potrebama i interesima privrede i privrednika a na obostrano zadovoljstvo i povećanje saradnje komora, privreda, jačanje uvoza i izvoza, povećanje rumunskih investicija na ovom prostoru.



Ambasador Rumunije posjetio Tuzlanski kanton



Premijer Tuzlanskog kantona Irfan Halilagić primio je u nastupnu posjetu ambasadora Rumunije N.J.E. Antona Pacuretua (Anton Pacuretu).

Premijer Halilagić je ovom prilikom ambasadoru predstavio Tuzlanski kanton, njegove privredne, kulturne, turističke i druge potencijale, te komparativne prednosti koje ima u odnosu na druga područja u Bosni i Hercegovini. Također, premijer Halilagić je Ambasadora pozvao na jačanje postojeće saradnje i uspostavljanje novih poslovnih i kulturnih odnosa koji će doprinijeti razvoju, kako

Tuzlanskog kantona, tako i prijateljske Rumunije.

Prema riječima ambasadora Pacuretua, Rumunija je regionalno veoma bliska Bosni i Hercegovini i ta bliskost je prilika za jačanje i stimulaciju privredne saradnje, te razmjene roba i usluga. Također, kazao je da se saradnja može i treba širiti i u okvirima obrazovnog sektora, razmjene studenata i nastavnika, te zajeničko učešće u međunarodnim obrazovnim programima.

„Radi se o regionalno bliskim državama, potencijala je mnogo i države trebaju stimulirati razvoj tih odnosa“ kazao je ambasador Pacuretu.

Posebna pažnja je posvećena europskom putu Bosne i Hercegovine. U tom smislu ambasador Pacuretu je izrazio podršku europskom putu naše zemlje, te istaknuo da će na tom putu u slučaju potrebe, Bosna i Hercegovina u Rumuniji imati partnera.

„Europski put je naša neminovnost i on nosi sigurnost za naše građane. Istovremeno on je i prilika za mlađe političare da se izdignu i donesu građanima prosperitet“, kazao je premijer Halilagić, zahvaljujući se Ambasadoru za pruženu ruku partnerstva i podrške.

Premijer Halilagić je izrazio zadovoljstvo posjetom, te pozvao da se putem privrednih komora, univerziteta ali i Ambasade i Kantonalne vlade, koje će takve projekte podržati, uspostave nove poslovne i druge potencijalne veze ovih prijateljskih zemalja.

Posjeta ambasadora Rumunije gradonačelniku Tuzle



Gradonačelnik Grada Tuzle, Jasmin Imamović, sastao se sa N.J.E. g-din. Antonom Pacuretua, ambasadorom Rumunije u BiH, u okviru prve službene posjete Nj.E. ambasadora Gradu Tuzli.

Gradonačelnik Jasmin Imamović i Nj. E. ambasador Anton Pacuretua razgovarali su ovom prilikom o aktuelnoj političkoj situaciji u zemlji i regionu, te o unapređenju saradnje između Rumunije i Bosne i Hercegovine, sa naglaskom na uspostavljanju bilateralne saradnje između Grada Tuzle i nekog od rumunskih gradova. Na sastanku je razgovarano i o euroatlantskim integracijama, te podršci Rumunije za pristup Bosne Hercegovine EU.

Ambasador Pacuretua je izrazio zadovoljstvo činjenicom da kompanije iz Tuzle već imaju intenzivnu saradnju sa rumunskim kompanijama, te naglasio da postoji interes i za razvijanjem saradnje u oblasti obrazovanja i kulture, te da posebno vidi potencijal u razvijanju saradnje u oblasti turizma.

S tim u vezi, gradonačelnik Tuzle je upoznao Nj. E. ambasadora sa razvojem Grada Tuzle, aktivnostima i projektima koji su do sada realizovani i projektima koji će biti realizovani u narednom periodu, a koji su značajni za unapređenje kvalitete života građana Tuzle, te izrazio spremnost za unapređenjem bilateralne saradnje na privrednim, socio-ekonomskim i obrazovnim projektima. „Zainteresovani smo jačanje privredne saradnje i razvijanje zajedničkih projekata, kao i za uspostavljanje saradnje sa nekim od rumunskih gradova, sa kojim Grad Tuzla može dijeliti zajedničke interese, razvijati saradnju naših građana, udruženja i poslovnih subjekata“, istakao je gradonačelnik Imamović.

Sastanku je prisustvovao i Andrei Glisca, prvi sekretar Ambasade Rumunije.



Sjednice komorskih tijela...

Održane sjednice UO i Skupštine Komore

XVIII sjednica Upravnog odbora i IX sjednica Skupštine Kantonalne privredne komore Tuzla



Sjednice najviših komorskih tijela održane su u martu 2022. godinu. Članovi Upravnog odbora Kantonalne privredne komore Tuzla održali su XVIII sjednicu, domaćin je bila Kantonalna privredna komora Tuzla. Razmatrani su a potom dati na usvajanje prvo Izvještaj o radu a potom i Izvještaj o finansijsko-materijalnom poslovanju Kantonalne privredne komore Tuzla za period januar-decembar 2021. godinu. Uz određene izmjene i dopune, oba dokumenta su usvojena i upućena Skupštini Komore na razmatranje i usvajanje. I članovi komorske Skupštine su na IX sjednici razmotrili i jednoglasno usvojili sve ponuđene dokumente sa dodatkom Izvještaj Nadzornog odbora o uvidu u Finansijski izvještaj Komore za 2021. godinu. Skupština Komore je na istoj sjednici, jednoglasno usvojila Odluku o usvajanju završnog računa i rasporedu viška prihoda po završnom računu za 2021. godinu.

Lokalno partnerstvo Tuzla predstavilo projekat...

„Partnerski pristup lokalnom razvoju Tuzla“

Partnerskim pristupom do novih radnih mjesta u gradu Tuzli



U Gradskoj upravi Tuzla je predstavljen projekt „Partnerski pristup lokalnom razvoju Tuzla“. Projekt je podržala Evropska unija, a odobrila Međunarodna organizacija rada. Realizuje se u okviru Lokalnog partnerstva za zapošljavanje Tuzla. Projekt ima za cilj jačanje kapaciteta nezaposlenih osoba za pokretanje vlastitih biznisa te transformacije ponude i potražnje radne snage u gradu Tuzli provođenjem programa prekvalifikacije i stručnog usavršavanja za deficitarna zanimanja.

Tokom sastanaka Gradskoj upravi Tuzla, potpisan je Sporazum o partnerstvu između članova Lokalnog partnerstva za zapošljavanje Tuzla, koji čine: Grad Tuzla, JU Služba za zapošljavanje TK, Kantonalna privredna komora Tuzla, Udruženje trenera CEFE u BiH, ustanove obrazovanja i privrednici sa područja Tuzle. Jasmin Imamović gradonačelnik Tuzle je izrazio veliki optimizam, kada je u pitanju realizacija predstavljenog projekta, koji se tiče jačanja postojećih poslovnih subjekata i zapošljavanja što većeg broja mladih ljudi i žena. Također, ukazao je na značaj formalizacije lokalnog partnerstva između vladinog sektora, nevladinog sektora, realnog sektora i ustanova obrazovanja. Ciljnu grupu građana prema kojima je usmjeren ovaj Projekt čine nezaposlene osobe iz Tuzle. Projektna aktivnosti su posebno usmjerene na ranjive kategorije građana, i to nezaposlene mlade osobe starosti do 35 godina i nezaposlene žene. Očekivani projektni rezultati će obuhvatiti do 120 nezaposlenih osoba, od čega je planirano pokretanje minimalno 15 novih biznisa i zapošljavanje minimalno 30 nezaposlenih osoba.

Lokalno partnerstvo za zapošljavanje Tuzla je jedno od 20 uspostavljenih u zemlji u okviru projekta „Podrška Evropske unije lokalnim partnerstvima za zapošljavanje – Faza II“ (LEP II), kojeg Evropska unija financira s 4 miliona eura, a provodi Međunarodna organizacija rada (ILO).

Ovaj projekat ima za cilj da doprinese poboljšanju prilika zapošljavanja u lokalnim zajednicama dajući podršku razvoju lokalnih partnerstava za zapošljavanje kao partnerski uspostavljenih mehanizama za tržište rada koji osiguravaju pristup formalnom zapošljavanju na lokalnom nivou.

Za više informacija o projektu LEP II, posjetite www.partnerstvo.ba i kanale društvenih mreža (Instagram, Facebook, Twitter i YouTube).

D.K.



Zajednički projekat MUP TK i Komore...

„Borba protiv kompjuterskog kriminala“

“Predavanja na teme: „BEC prijevare (Business e-mail compromise) – presretanje e-mail komunikacija između privrednih subjekata sa izmjenama podataka bankovnih računa na koje se vrše uplate“ i „Kriptovanje podataka na serverima/racunarima“



Uprava policije Ministarstva unutrašnjih poslova Tuzlanskog kantona u saradnji sa Kantonalnom privrednom komorom Tuzla provodi javnu kampanju „Borba protiv kompjuterskog kriminala“. U Kantonalnoj privrednoj komori Tuzla počeo je zajednički projekat, predavanjem predstavnicima firmi članica Komore. Kako je istaknuto na skupu u Komori, cilj ove kampanje je prevencija izvršenja krivičnih djela iz ove oblasti i povećanje nivoa informacione sigurnosti privrednih subjekata i fizičkih lica na području Tuzlanskog kantona, te podizanje svijesti o trenutnim trendovima u oblasti kompjuterskog kriminala.

“Analize koje smo uradili ukazuju na porast kriminala ove vrste. Ovo je dokaz da građani, privrednici nisu dovoljno upućeni u ovaj problem u kojem smo svi potencijalne žrtve. Ovo je velik problem kojem se mora studiozno pristupiti pa je s tim u vezi i pokrenuta ova kampanja koja ima za cilj prevenciju ove vrste kriminala i edukaciju određenih kategorija stanovništva. Javna kampanja će se odvijati u tri pravca, odnosno biće usmjerena prema tri ciljne grupe: pravna lica (privredna društva), fizička lica i maloljetnici, a predstavlja način skretanja pažnje na sve zastupljeniju pojavu krivičnih djela iz ove oblasti. Ujedno, kampanja omogućava navedenim ciljnim grupama da dobiju ključne informacije o sigurnosti na internetu, kako se zaštititi, kome prijaviti i kako potražiti podršku”, rekao je Dževad Korman direktor Uprave policije MUP-a TK.

U okviru kampanje usmjerene prema privrednim društvima, prvenstveno onima koji se bave izvozom-uvozom, održano je predavanje za predstavnike privrednih društava na temu kompjuterskog kriminala, prvoj grupi prijavljenih firmi članica Komore.

“Zadovoljstvo je što smo prepoznati kao partner u ovom značajnom projektu, u dijelu privrede, naših članica. Domaćini smo predavanjima oja su organizovana na teme: „BEC prijevare (Business e-mail compromise) – presretanje e-mail komunikacija između privrednih subjekata sa izmjenama podataka bankovnih računa na koje se vrše uplate“ i „Kriptovanje podataka na serverima/

racunarima“. Angažovani predavači su istražitelji Odsjeka za borbu protiv organizovanog kriminala u Sektoru kriminalističke policije Ministarstva unutrašnjih poslova Tuzlanskog kantona”, rekao je Nedret Kikanović predsjednik Kantonalne privredne komore Tuzla.



I dalje su otvorene mogućnosti članicama da se prijave u Komoru, da se formira nova grupa privrednika kojima će biti održano ovakvo predavanje. „Pozivamo sve privredne subjekte, firme članice Komore, zainteresovane na navedenu kampanju, da se prijave u Komoru, kako bi pristupili formiranju nove grupe i određivanju datuma predavanja. Prijava je moguća na: e-mail komora@kpktz.ba ili usmeno putem telefona sa brojem: 035/369-550“, upućen je poziv privrednicima, firmama članicama Kantonalne privredne komore Tuzla.

D.K.



Nastavak uspješne saradnje...

Kvalitenija saradnja ministarstava i privrednih komora

Cilj smanjiti broj nezaposlenih osoba u dva kantona - Sagledana iskustva, ideje i rezultati dosadašnjih aktivnosti - Za očekivati je u narednom periodu jačanje saradnje, aktivnosti na više zajedničkih projekata



Kantonalnu privrednu komoru Tuzla posjetila je Azra Sinanović ministrica Ministarstva za rad, socijalnu politiku i izbjeglice Zeničko-dobojskog kantona sa saradnicima.

Sastanku je prisustvovao Nurdin Muhamedbegović pomoćnik ministra za rad i zapošljavanja, pravnih općih i ekonomskih poslova u Ministarstvu za rad, socijalnu politiku i povratak Tuzlanskog kantona. Povod za ovaj sastanak bili su razgovori o načinima nastavka i mogućnostima unaprijeđenja saradnje resornih kantonalnih ministarstava i kantonalnih privrednih komora Zenica i Tuzla.

Bila je ovo prilika da se podijele iskustva vezana za ranije realizovane projekte, da se predstavne aktivnosti i dosadašnji rezultati ministarstava, te da se otvore mogućnosti kvalitetnijoj saradnji Ministarstva te cjelokupne Vlade Tuzlanskog kantona za Kantonalnom privrednom komorom Tuzla.

“Zahvaljujemo se predstavnicima ministarstava na posjeti Komori. Raduje da nastavljamo saradnju sa Zeničko-Dobojskim kantonom, Komorom i resornim ministarstvom, i nakon izuzetno uspješne saradnje na projektu “Helvetas”. Sagledali smo njihova iskustva, načine rada i smatramo da nam trebaju ovakvi sastanci kako bi zajednički podijelili iskustva, došli do novih ideja i načina rješavanja onih problema na kojima treba da se radi u Tuzlanskom kantonu kada je u pitanju osposobljavanje i zapošljavanje radne snage. Nadamo se da će u ovoj godini saradnja biti podignuta na viši nivo i da ćemo naći načini da i u Tuzlanskom kantonu slijedimo primjer dobre prakse u oblasti zapošljavanja, ostvarenog u saradnji Ministarstva i Privrednom komorom u Zeničko-Dobojskom kantonu”, izjavio je Nedret Kikanović predsjednik Kantonalne privredne komore Tuzla.

“Drago nam je da smo u Tuzli i da imamo priliku prenijeti naša iskustva i znanja iz saradnje sa našim partnerima u realizaciji nekoliko projekata na području našeg kantona. Razgovarali smo i o projektima koje planiramo realizovati u toku tekuće godine. Sa Privrednom komorom imamo izuzetno dobru saradnju, partnerski odnos, Vlada je potpisala Memorandum o saradnji sa Privrednom komorom na projektima koje provodi na području Zeničko-Dobojskog kantona. Privredna komora je partner svih ministarstava u

našoj Vladi a ne samo ovog Ministarstva a mi smo prepoznali njihov značaj kada je u pitanju realizacija projekata iz oblasti zapošljavanja mladih i njihovom ostanku u našem kantonu. To nam je motiv da i u ovoj i narednim godinama poduzimamo zajedničke projekte. Također, otvoreni smo za saradnju i sa resornim ministarstvom iz Tuzlanskog kantona i kantonalnom privrednom komorom Tuzla, na zajedničkim projektima, sa zajedničkim idejama i naporima za stvaranje pozitivnog okruženja u Bosni i Hercegovini”, izjavila je Azra Sinanović ministrica Ministarstva za rad, socijalnu politiku i izbjeglice Zeničko-dobojskog kantona.

Za očekivati je da će sastanak u Komori, razmjena iskustava i ideja, biti od koristi i Ministarstvu za rad, socijalnu politiku i povratak Tuzlanskog kantona.

“Razgovarali smo o problemima sa kojima se susreću svi kantoni. Aktuelan je problem zapošljavanja, povećanje broja zaposlenih, zadržavanje mladih kadrova u našoj zemlji.

Svi to radimo i sa ovim problemima se nosimo na različite načine, onako kako je bilo moguće i kako se smatralo da je dobro i da može polučiti određene rezultate. Dobili smo nova saznanja, ideje, čuli iskustva i za pokušat ćemo napraviti korake kako bi sve to primjenili i na našem području”, izjavio je Nurdin Muhamedbegović pomoćnik ministra za rad i zapošljavanja, pravnih općih i ekonomskih poslova u Ministarstvu za rad, socijalnu politiku i povratak Tuzlanskog kantona.

Dogovoreno je da se o svemu razgovaranom na sastanku u Tuzli, izvijeste resorni ministar, premijer i Vlada Tuzlanskog kantona, da se organizuje novi sastanak u Zenici, u resornom ministarstvu pri Vladi Zeničko-Dobojskog kantona. Za očekivati je u narednom periodu jačanje saradnje, aktivnosti na više zajedničkih projekata, rezultate i uspjeh kao što je ponudila saradnja na projektu „Izgradnja standarda kvaliteta u obrazovanju odraslih“ u čijoj realizaciji su učestvovali Privredna komora Kantona Sarajevo, Privredna komora Zeničko – dobojskog kantona, Kantonalna privredna komora Tuzla, a kojeg su finansijski podržali Fondacija Helvetas – Moja budućnost i Federalni zavod za zapošljavanje.

Pripremio: Dino Kalesić



Održan 43. međunarodni sajam turizma u Beogradu...

Privreda TK na Sajmu turizma u Beogradu

Više od 350 izlagača iz više od 25 zemalja svijeta



U Beogradu je održan 43. Međunarodni sajam turizma na kojem je učestvovalo više od 350 izlagača iz više od 25 zemalja svijeta. I ove godine, na jednoj od najznačajnijih sjamskih manifestacija iz oblasti turizma u ovom dijelu Evrope, nastupila je i Kantonalna privredna komora Tuzla.

Sajam je održan pod sloganom “Između planina i mora” a ove godine je protekao u znaku oporavka i obnove turističkog ambijenta nakon izbijanja pandemije korona virusa, zbog koje je prošle godine bio otkazan.

Predstavili se: Grčka, Turska, Crna Gora, Tunis, Egipat, Bosna i Hercegovina, Bugarska, Sjeverna Makedonija, Rumunija, Mađarska, Slovačka, Maldivi, a pojedinačno su nastupali i izlagači iz Albanije, Hrvatske i Slovenije.

Po prvi put ove godine posjetiocima su ekskluzivno predstavljene tri nove, i u svjetskim okvirima, vrhunske destinacije: egzotična Malezija i Demokratska Republika Sao Tome i Principe, koju čine dva ostrva u Gvinejskom zalivu u centralnoj Africi, kao i Angola, izvrsna destinacija za ljubitelje dugih pješćanih plaža.

Organizatori su istakli da su ovogodišnju manifestaciju obilježili promocija trendova i inovacija koje će oblikovati budućnost turističke industrije. Tour operateri su u četiri sajamska dana posjetiocima nudili ekskluzivne sajamske cijene, first minut ponude i pakete sa pogodnostima za porodična putovanja, kao i za mlade. Posjetioci su imali priliku da izaberu putovanja prema svojim afinitetima: porodična putovanja, daleke i egzotične destinacije, putovanja za mlade, city break, odmor i oporavak u banjama, spa vikendi na planinama, eko i aktivni turizam, kongresna dešavanja.

U okviru 43. Međunarodnog sajma turizma održani su i 17. Međunarodni sajam hotelsko-ugostiteljske opreme HORECA-OPREMA i 12. Međunarodni sajam vina BEOWINE.

Dan prije zvaničnog otvaranja kapija 43. Međunarodnog beogradskog sajma turizma za posjetioce, u hali 5 Beogradskog sajma, specijalno uređenoj za ovu priliku, u prisustvu brojnih gostiju, predstavnika diplomatskog kora, društvenog, kulturnog i političkog života Srbije, te izlagača i drugih učesnika, upriličena je svečanost povodom početka

rada ove najveće turističke smotre u regionu.

Marija Labović, direktorica Turističke organizacije Srbije, izjavila je kako smatra da Sajam turizma predstavlja pravo mjesto i pravi trenutak da se pokaže šta je to urađeno u prethodnom periodu i koje su to novine uvedene a sve, kako bi unaprijedili turističke destinacije, prilagodili se novim zahtjevima gostiju i turista.



“Za nas je najvažniji cilj boljitak u turizmu, veći turistički promet i više turista na našim destinacijama. U pripremama ovog sajma više puta je naglašavano da se vidimo i okupljamo poslije duže pauze. Imali smo pauzu kad je sajamski nastup u pitanju, ali zaposleni u turizmu nisu bili na pauzi, oni su vrlo aktivno i vrijedno radili i stalno bili pred izazovom da se prilagode novonastaloj situaciji, da unaprijede svoje destinacije, da uđu u njihovu još intenzivniju promociju i u borbu za još bolji kvalitet svega što imamo i što možemo da ponudimo našim turistima. Drago nam je što je ovaj sajam ostao i postao privlačan



i za nove izlagače i nove destinacije. Zadovoljni smo što i ove godine imamo nove zemlje učesnice na Beogradskom sajmu", rekla je direktorica Labović.

Zoran Radojičić gradonačelnik Beograda je na svečanosti otvaranja Sajma naglasio značaj Sajma turizma za grad Beograd, koji sa ovom manifestacijom postaje centar dešavanja u ovoj privrednoj grani.

"Za grad Beograd je važno da i na ovom sajmu može da prezentuje svoju raznolikost, kulturno-istorijsku tradiciju grada Beograda, koja seže i 5.000 godina unazad. Tu su i arheološka nalazišta iz perioda Rimskog carstva, da i ne govorimo o novim istorijskim dešavanjima posljednjih 2000 godina, kojima Beograd obiluje. Malo gradova u Evropi ima takvu raznolikost i takva bogatstva, možemo se porediti sa najljepšim italijanskim ili francuskim gradovima. Beograd ima i bogat kulturni i festivalski život, poznat je i po noćnom životu, gostoprimstvu i gastronomiji. Beograd ima potencijale i u domenu ekoturizma, zdrave hrane, pogotovo u našim prigradskim opštinama, imamo Avalu, Kosmaj, Ratno ostrvo, Adu Ciganliju. Razvoj Beograda je nešto što omogućava razvoj turizma – kada pogledate Beograd na vodi, bilo koji turista koji dođe ostaje fasciniran i kako se taj dio grada razvija. Tu je i donji Dorćol sa budućim linijskim parkom, pa Hram Svetog Save. Zato svim učesnicima Sajma turizma preostaje jedino da spoje lijepo sa korisnim i da sklope dogovore i sporazume", poručio je Radojičić.

Zanimljivo je da je među učesnicima kulturno-umjetničkog programa na otvaranju bila i svjetski priznata i poznata primadona Sanja Kerkez, inače, rođena Tuzlanka.

Kao nezaobilazna polazna tačka za novu turističku godinu, za koju postoje opravdano velika očekivanja, Beogradski sajam turizma ostaje važna referenca turističkog predstavljanja u regionu i ambijent za promociju trendova i inovacija koje će oblikovati budućnost turističke industrije. Sajam turizma i ove godine, zahvaljujući vrijednoj, profesionalnoj i kvalitetnoj ekipi organizatora, bio je mjesto kompletnog doživljaja: inspiracije za putovanja, upoznavanje sa kulturama svijeta, druženje sa ljudima i stvaranje uspomena, degustaciju najukusnijih proizvoda, vina i rakije sa ovih prostora.

• Privreda TK na sajmu u Beogradu

Zahvaljujući susretljivosti Dragana Zečevića koordinatora projekta Sajma turizma, izuzetno dobrim odnosima, kvalitetnoj saradnji u prethodnom periodu sa Beogradskim sajmom, Kantonalna privredna komora Tuzla je i ove godine obezbijedila prostor za predstavljanje svojih članica. Od 2019. godine Komora je redovan učesnik ovog najvećeg turističkog sajma u regionu, sa zajedničkom postavkom Privreda TK.

Ove godine, u saradnji sa Turističkom zajednicom Grada Tuzla i članicama Udruženja za trgovinu, ugostiteljstvo i turizam te Udruženja turističkih agencija, Komora je pripremila i jednu novost. Riječ je o afiši, svojevrsnom pozivu turistima da posjete Panonska jezera, Tuzlu, Tuzlanski kanton, koji nudi paket ponudu i prijedlog, šta posjetiti, vidjeti prilikom boravka u Tuzli, kako provesti jedan ili više dana. Želja je bila ovo akcijom turistima, posjetiocima Tuzle i Tuzlanskog kantona, ponuditi nešto novo. Ponuditi potpuno drugi pristup ljetovanju, godišnjem odmoru, ljetnim turističkim destinacijama. Pripremljeni su prijedlozi sadržaja za jednodnevni, dvodnevni i trodnevni boravak u Tuzli i Tuzlanskom kantonu sa posebnim pogodnostima. Za posjetioce, donosiocce brošure, uz preporuku šta da posjete, priređeni su i određeni popusti pri posjetama ugostiteljskim objektima, panonskim jezerima, frizerskom salonu, mjenjačnici, uključujući i pogodnosti za prijevoz na relaciji Beograd - Tuzla - Beograd. Ponuda je distribuirana u Beogradu na Sajmu turizma tokom četiri dana trajanja sajma. ostvareni su brojni konakti, razgovori sa pojedincima, agencijama, organizacijama, zajednicama, ponuđena afiša, upućen poziv da posjete tuzlansku Panoniku. Donosilac afişe ostvaruje navedene popuste i važi samo za turiste iz inostranstva, konkretno, posjetioce Sajma turizma u Beogradu.

Na sajmu turizma u okviru zajedničkih izložbenog prostora "Privreda TK", učestvovali su Turistička zajednica Grada Tuzla, TA "Golden Tours" Tuzla, TA "Transturist" Tuzla, hotel "Vertigos" Tuzla, hotel "Tehnograd" Tuzla, restoran "Bardak" Živinice, restoran "Mama Mia Origins" tuzla, JKP "Pannonica" Tuzla, "Old Story Pub" Tuzla, "Limenka" gradska čevabdžinica Tuzla, pizzeria "Barok" Tuzla, "Palačinkara kod Bagija" Tuzla, mjenjačnica "Emma" Tuzla, Frizerski salon i fen bar "Studio 21" Tuzla, "Piemonte" dd Tuzla, restoran "Ljubavna priča" Tuzla, hotel "Mellain" Tuzla, Hotel "Terme Ozren" Bosansko Petrovo Selo, hotel "Vidikovac" Divič, sve firme članice Komore koje su na zajedničkom štandu u Hali četiri Beogradskog sajma pripremle bogatu ponudu za posjetioce.

Nastup navedenih firmi, predstavnika privrede TK i BiH, na najvećoj turističkoj manifestaciji u regionu organizovala je Kantonalna privredna komora Tuzla.

Pripremio: Dino Kalesić



Press konferencija u Komori...


ANALIZA PRIVREDNIH KRETANJA U TUZLANSKOM KANTONU U 2021. GODINI



U Kantonalnoj privrednoj komori Tuzla upriličena je konferencija za novinare na kojoj je predstavljena « Analiza privrednih kretanja na području Tuzlanskog kantona u 2021. godini ». Predstavnicima sredstava informisanja obratili su se predsjednik Komore i sekreteri komorskih udruženja, predloživši osnovne karakteristike analize za svaku pojedinačnu industrijsku granu.

Industrija Tuzlanskog kantona je većinski izvozno orjentisana i većinu poslovnih aktivnosti obavlja za potrebe Evropskog tržišta (Njemačka, Austrija, Italija) pa se svi poremećaji i turbulencije sa globalnog tržišta vrlo brzo osjete u domaćoj privredi. Obim industrijske proizvodnje u 2021. godini je u odnosu na 2020. godinu veći za 2,8%. Većina djelatnosti je zabilježila rast obima proizvodnje u odnosu na 2020. godinu što je rezultat postepene normalizacije poslovanja poslije korona krize.

OBIM INDUSTRIJSKE PROIZVODNJE 2021/2020 (%)



Vanjskotrgovinska razmjena u Tuzlanskom kantonu u 2021. godini je ostvarila rast od 24,3% u odnosu na 2020. godinu, s ukupnom nominalnom vrijednosti izvoza od 2.076.750.000 KM. Ovo je u značajnoj mjeri rezultat oporavka od 2020. godine koju su obilježila zatvaranja i otežano poslovanje uslijed pandemije, ali i djelimično rezultat inflacije koja je zadesila Evropu i svijet zbog mjera za oporavak privrede poslije pandemije. Došlo je i do rasta uvoza od 27%, sa nominalnom vrijednosti izvoza od 2.377.354.000 KM.

	Izvoz I-XII 2021 (000 KM)	2021/2020 (%)	Uvoz I-XII 2021 (000 KM)	2021/2020 (%)
Ukupno	2.076.750	24,3	2.377.354	27
Hrana i piće	64.696	3,4	212.290	13,5
Industrijski materijali	818.018	28,5	1.009.845	30,8
Goriva i maziva	310.530	76,9	307.400	56,1
Kapitalni proizvodi	356.231	12,2	382.760	9,4
Transportna sredstva	129.369	12,6	145.939	36,5
Proizvodi za široku potrošnju	397.834	9,3	319.080	23,8

U Tuzlanskom kantonu je s krajem 2021. godine evidentirano 103.508 zaposlenih i 70.301 nezaposlenih osoba. U odnosu na kraj 2020. godine, došlo je do rasta broja zaposlenih od 2,1% i pada broja nezaposlenih na evidencijama službe za zapošljavanje od 8,56%. Najviše zaposlenih je u prerađivačkoj industriji i trgovini. Prosječna neto plaća je 955 KM i za 10,7% je veća u odnosu na prosječnu plaću iz 2020. godine.

Djelatnost decembar 2021.	Neto plaća (KM)	Bruto plaća (KM)	Djelatnost decembar 2021.	Neto plaća (KM)	Bruto plaća (KM)
A Poljoprivreda, šumarstvo i ribolov	878	1.381	J Informacije i komunikacije	1.550	2.432
B Vađenje ruda i kamena	1.113	1.669	K Finansijske djelatnosti	1.560	2.435
C Prerađivačka industrija	767	1.149	L Poslovanje nekretninama	877	1.346
D Proizvodnja i snabdijevanje el.en., plinom	1.868	2.929	M Stručne, naučne i tehničke djelatnosti	1.121	1.730
E Snabdijevanje vodom i uklanjanje otpadnih voda	989	1.527	N Administrativne i pomoćne uslužne djelatnosti	739	1.151
F Građevinarstvo	675	1.017	O Javna uprava i odbrana	1.326	2.063
G Trgovina na veliko i malo	697	1.053	P Obrazovanje	844	1.307
H Prevoz, skladištenje i komunikacije	708	1.073	Q Zdravstvena socijalna zaštita	1.631	2.458
I Hotelištvo i ugostiteljstvo	538	798	R Umjetnost, zabava i rekreacija	842	1.297
			S Ostale uslužne djelatnosti	1.048	1.661

U 2021. godini poslovalo 3.840 privrednih subjekata – pravnih lica koji zapošljavaju 69.990 osoba. U odnosu na 2020. godinu broj zaposlenih u privrednim društvima je veći za 1,2%. Došlo je do rasta ukupnog prihoda od prodaje za 17,54% i rasta prihoda od izvoza za 25,26%.

OPŠTI PODACI	2019 (KM)	2020 (KM)	2021 (KM)	2021/2020	2021/2019
Broj kompanija	3.809	3.853	3.840	-0,34	0,81
Ukupan broj zaposlenih	70.517	69.143	69.990	1,22	-0,75
Ukupan prihod od prodaje	7.722.409.881	7.318.691.741	8.602.078.973	17,54	11,39
Prihod od izvoza	1.593.413.594	1.455.081.283	1.822.641.394	25,26	14,39
Ukupna dobit	436.216.890	428.213.036	601.063.287	40,37	37,79
Prihod po zaposlenom	109.511	105.849	122.904	16,11	12,23
Prosječan trošak plaće po zaposlenom	18.269	19.026	20.292	6,65	11,07

Posmatrano po jedinicama lokalne samouprave, Tuzla kao administrativni i privredni centar Kantona ima najveći broj privrednih subjekata (1.423) u kojima zapošljava 27.853 osobe. Najveći prihod od izvoza su ostvarile firme iz Lukavca u kojem je skoncentrisana hemijska industrija (645 miliona KM), a slijede Gradačac i Gračanica u kojima su najrazvijenije metaloprerađivačka i plastičarska industrija koje su među najzanimljivijim izvoznim djelatnostima.

POLJOPRIVREDA I PREHRAMBENA INDUSTRIJA

Firme za obavljanje poljoprivredne djelatnosti u 2021. godini su ostvarile ukupan prihod od 58,8 miliona KM što je za 2,9% više u odnosu na 2020.



KANTONALNA PRIVREDNA KOMORA TUZLA KOMORSKI INFORMATOR



FS 71622

godinu. Prosječna neto plaća u poljoprivredi i šumarstvu je 878 KM i 5,15% je veća u odnosu na prosječnu platu u toj djelatnosti u 2020. godini.

Poljoprivreda	2019 (KM)	2020 (KM)	2021 (KM)	2021/2020 (%)	2021/2019 (%)
Broj kompanija	63	66	57	-13,64	-9,52
Ukupan broj zaposlenih	335	330	356	7,88	6,27
Ukupan prihod od prodaje	51.773.118	57.166.395	58.857.510	2,96	13,68
Prihod od izvoza	n/a	2.908.024	4.778.973	64,34	n/a
Ukupna dobit	-366.489	1.374.852	632.907	-53,97	272,69

Proizvodnjom prehrambenih proizvoda i pića u Tuzlanskom kantonu se bavi 103 privredna subjekta koji zapošljavaju 1.733 osobe. Ostvaren je ukupan prihod od prodaje 253.995.643 KM i veći je u odnosu na 2020. godinu za 4,71% dok je prihod od izvoza hrane i pića bio 53,9 miliona KM i manji je za 3,9% u odnosu na prethodnu godinu.

Proizvodnja hrane i pića	2019 (KM)	2020 (KM)	2021 (KM)	2021/2020 (%)	2021/2019 (%)
Broj kompanija	111	111	103	-7,21	-7,21
Ukupan broj zaposlenih	1.789	1.715	1.733	1,05	-3,13
Ukupan prihod od prodaje	247.994.912	242.578.614	253.995.643	4,71	2,42
Prihod od izvoza	49.595.380	56.137.050	53.941.521	-3,91	8,76
Ukupna dobit	10.060.099	9.230.140	8.812.716	-4,52	-12,40

DRVOPRERAĐIVAČKA INDUSTRIJA

U drvoprerađivačkoj industriji Tuzlanskog kantona posluje 155 kompanija od čega 98 u djelatnosti prerade drveta i 57 u proizvodnji namještaja. Ukupno zapošljavaju 3.476 osoba. U 2021. godini su ostvarile ukupan prihod od prodaje od 296,7 miliona KM od čega je prihod od izvoza bio 183 miliona KM. Ukupna dobit drvoprerađivačke industrije je bila 23,1 milion KM.

Drvoprerađivačka industrija	Prerada drveta osim namještaja			Proizvodnja namještaja		
	2020	2021	2021/2020 (%)	2020	2021	2021/2020 (%)
Broj kompanija	96	98	2,08	53	57	7,55
Ukupan broj zaposlenih	1.550	1.502	-3,10	1.812	1.974	8,94
Ukupan prihod od prodaje	115.154.133	130.892.925	13,67	147.860.493	165.787.412	12,12
Prihod od izvoza	58.331.914	69.372.572	18,93	101.167.603	113.600.755	12,29
Ukupna dobit	4.705.464	10.849.100	130,56	7.999.368	12.273.259	53,43

INDUSTRIJA TEKSTILA I KOŽE

Indeks industrijske proizvodnje za period januar-decemba pokazuje da je došlo do rasta obima proizvodnje u 2021. godini u odnosu na 2020. i to 37% u djelatnosti proizvodnje tekstila i 11,1% u proizvodnji odjeće, te pada obima proizvodnje od 16% u djelatnosti proizvodnje kože i srodnih proizvoda. U istom periodu došlo je do pada izvoza obuće i odjeće od oko 5%, tkanina i tekstilnih proizvoda 3% i kože i proizvoda od kože oko 20%. U ovim industrijama posluje 76 kompanija od čega 21 u kožarskoj i 55 u proizvodnji tekstila i odjeće. U 2020. Došlo je do pada broja zaposlenih od 13,4% i trenutno je zaposleno 4.090 radnika. Industrija tekstila i odjeće zapošljava 1.915 radnika što je za 11% manje u odnosu na 2020. godinu. Došlo je do rasta prihoda od prodaje za 7,01% i rasta prihoda od izvoza za 3,19% u odnosu na 2020. godinu, ali su ostvareni prihodi manji u odnosu na one ostvarene u 2019.godini (prije pandemije korona virusa). Ukupna dobit ostvarena u 2021. godini je za 4,1% veća nego u prethodnoj godini.

Tekstilna industrija	2019 (KM)	2020 (KM)	2021 (KM)	2021/2020 (%)	2021/2019 (%)
Broj kompanija	54	53	55	3,77	1,85
Ukupan broj zaposlenih	2.347	2.158	1.915	-11,26	-18,41
Ukupan prihod od prodaje	66.666.164	60.479.438	64.718.746	7,01	-2,92
Prihod od izvoza	46.154.551	38.977.428	40.219.224	3,19	-12,86
Ukupna dobit	3.357.749	3.058.761	3.184.289	4,10	-5,17

Pademija korona virusa prethodne dvije godine, ostavila je mnogo veće posljedice na industriju kože. Došlo je do smanjenja broja zaposlenih za 15% u odnosu na 2020. i 24% u odnosu na 2019.godinu. Pad prihoda od prodaje je 20%, pada prihoda od izvoza 31% te je djelatnost ostvarila ukupni gubitak veći od 6,6 miliona KM.

GRAĐEVINARSTVO

Kao i većina industrijskih grana ni građevinarstvo još nije dostiglo nivo poslovanja prije pandemije. U 2021. je 136 kompanija bilo registrovano za građevinske radove, od čega 102 u visokogradnji i 34 u niskogradnji. Ukupno zapošljavaju 3.509 radnika što je za 2,7% više u odnosu na 2020. , ali 0,6% manje u odnosu na 2019. godinu. Ostvaren je ukupan prihod od 338 miliona KM i dobit od 29 miliona KM. Prosječna neto plaća u građevinarstvu je 675 KM i 15,8% je veća od prosječne plaće u građevinarstvu u 2020. godini.

Visokogradnja	2019	2020	2021	2021/2020 (KM)	2021/2019 (KM)
Broj kompanija	94	96	102	6,25	8,51
Ukupan broj zaposlenih	2.249	2.088	2.229	6,75	-0,89
Ukupan prihod od prodaje	231.774.717	164.613.525	215.080.509	30,66	-7,20
Prihod od izvoza	36.774.995	29.435.247	25.351.520	-13,87	-31,06
Ukupna dobit	25.833.353	9.499.620	18.549.659	95,27	-28,19

Niskogradnja	2019	2020	2021	2021/2020 (%)	2021/2019 (%)
Broj kompanija	31	33	34	3,03	9,68
Ukupan broj zaposlenih	1.281	1.329	1.280	-3,69	-0,08
Ukupan prihod od prodaje	139.176.416	145.883.566	122.766.836	-15,85	-11,79
Prihod od izvoza	9.379.707	8.697.441	7.982.717	-8,22	-14,89
Ukupna dobit	14.362.590	22.901.408	10.426.725	-54,47	-27,40

RUDARSTVO

Vađenje uglja i lignita u 2021. godini imalo je pad obima proizvodnje od 9,3%. Ovom djelatnošću se bave tri rudnika koji zapošljavaju 5.639 radnika. Došlo je do pada ukupnog prihoda od prodaje 14% i rasta prihoda od izvoza od 2,13%.

Vađenje uglja i lignita	2019	2020	2021	2021/2020 (%)	2021/2019 (%)
Broj kompanija	3	3	3	0,00	0,00
Ukupan broj zaposlenih	6.136	5.864	5.639	-3,84	-8,10



KANTONALNA PRIVREDNA KOMORA TUZLA KOMORSKI INFORMATOR



FS 71622

Ukupan prihod od prodaje	267.946.845	264.435.887	227.473.097	-13,98	-15,11
Prihod od izvoza	9.605.184	10.484.028	10.707.297	2,13	11,47

Kada je u pitanju vađenje ostalih ruda i kamena, ostvaren je ukupan prihod od prodaje u vrijednosti od 91,3 miliona KM, što je pad od 1,71%. U isto vrijeme ostvaren je rast prihod od izvoza i ukupne dobiti od 5%.

Vađenje ostalih ruda i kamena	2019	2020	2021	2021/2020 (%)	2021/2019 (%)
Broj kompanija	13	14	14	0,00	7,69
Ukupan broj zaposlenih	956	935	914	-2,25	-4,39
Ukupan prihod od prodaje	93.881.949	92.945.417	91.357.492	-1,71	-2,69
Prihod od izvoza	32.289.125	30.671.077	32.290.143	5,28	0,00
Ukupna dobit	11.364.365	11.693.170	12.330.191	5,45	8,50

HEMIJSKA INDUSTRIJA I INDUSTRIJA NEMETALA

U hemijskoj industriji i industriji nemetala posluje značajan broj kompanija koje zajedno upošljavaju 4.491 osobu, od čega najviše u djelatnosti proizvodnje proizvoda od gume i plastike. U proizvodnji hemikalija i hemijskih proizvoda je u 2021. došlo do pada prihoda od prodaje 1,41% i pada prihoda od izvoza 3,11% u odnosu na 2020.godinu. Ukupna dobit je bila 21,4 miliona KM i za 29% je manja u odnosu na dobit iz prethodne godine.

Hemijska industrija	2019	2020	2021	2021/2020 (%)	2021/2019 (%)
Broj kompanija	16	15	14	-6,67	-12,50
Ukupan broj zaposlenih	902	913	839	-8,11	-6,98
Ukupan prihod od prodaje	257.776.781	259.621.847	255.948.678	-1,41	-0,71
Prihod od izvoza	202.683.306	206.246.363	199.828.420	-3,11	-1,41
Ukupna dobit	23.762.502	30.238.697	21.416.549	-29,18	-9,87

Proizvodnju farmaceutskih proizvoda obavljaju dvije firme, koje su ostvarile ukupan prihod od prodaje od 13 miliona KM od čega je 50% prihoda ostvareno od izvoza. Proizvodnja ostalih nemetalnih mineralnih proizvoda (razni građevinski materijali) je u 2021. imala rast prihoda od prodaje od 10,28%, sa ukupnim prihodom od 129,6 miliona KM i rasta prihoda od izvoza za 101%. Povećan je broj zaposlenih za 1,6%, a ukupna dobit ove djelatnosti je u odnosu na godinu prije bila veća za 13,7%.

Ostali nemetali (građevinski materijal)	2019	2020	2021	2021/2020 (%)	2021/2019 (%)
Broj kompanija	21	24	25	4,17	19,05
Ukupan broj zaposlenih	551	551	560	1,63	1,63
Ukupan prihod od prodaje	112.360.085	117.526.445	129.612.912	10,28	15,35
Prihod od izvoza	7.463.714	7.049.683	14.212.744	101,61	90,42
Ukupna dobit	15.571.504	18.200.343	20.695.477	13,71	32,91

Proizvodnja proizvoda od gume i plastike sa svojih 2.979 uposlenih je imala rast broja zaposlenih za 21%, rast prihoda od prodaje od 40,7% i rasta prihoda od izvoza 32,13% u odnosu na 2020. godinu.

Guma i plastične mase	2019	2020	2021	2021/2020 (%)	2021/2019 (%)
Broj kompanija	79	83	86	3,61	8,86
Ukupan broj zaposlenih	2.266	2.460	2.979	21,10	31,47
Ukupan prihod od prodaje	231.527.902	269.936.026	379.935.139	40,75	64,10
Prihod od izvoza	115.876.372	122.152.434	161.399.211	32,13	39,29
Ukupna dobit	16.800.394	27.350.309	38.803.351	41,88	130,97

METALOPRERAĐIVAČKA I ELEKTROINDUSTRIJA

Metaloprerađivačka industrija zapošljava 3.289 osoba i najvažnija je izvozna djelatnost Tuzlanskog kantona sa ukupnim prihodom od izvoza od 266 miliona KM. Proizvodnja metalnih proizvoda ostvarila je rast ukupnog prihoda od prodaje 31% i rast prihoda od izvoza 39,6%

Proizvodnja baznih metala	2019	2020	2021	2021/2020 (%)	2021/2019 (%)
Broj kompanija	6	6	6	0,00	0,00
Ukupan broj zaposlenih	372	338	305	-9,76	-18,01
Ukupan prihod od prodaje	56.825.500	53.344.159	62.858.583	17,84	10,62
Prihod od izvoza	25.007.614	28.371.117	32.041.030	12,94	28,13
Ukupna dobit	2.849.697	-176.288	2.642.756	n/a	-7,26

Proizvodnja metalnih proizvoda	2019	2020	2021	2021/2020 (%)	2021/2019 (%)
Broj kompanija	110	119	126	5,88	14,55
Ukupan broj zaposlenih	2.823	2.836	2.989	5,39	5,88
Ukupan prihod od prodaje	393.374.278	377.866.794	494.666.764	30,91	25,75
Prihod od izvoza	172.477.581	168.092.291	234.616.314	39,58	36,03
Ukupna dobit	23.298.964	20.556.592	40.860.813	98,77	75,38

Proizvodnja električne opreme	2019	2020	2021	2021/2020 (%)	2021/2019 (%)
Broj kompanija	11	14	14	0,00	27,27
Ukupan broj zaposlenih	683	631	1.185	87,80	73,50
Ukupan prihod od prodaje	44.051.348	50.805.203	123.905.961	143,88	181,28
Prihod od izvoza	18.600.205	23.011.043	31.071.309	35,03	67,05
Ukupna dobit	3.390.295	8.504.901	10.573.807	24,33	211,88

Proizvodnja mašina i uređaja	2019	2020	2021	2021/2020 (%)	2021/2019 (%)
Broj kompanija	36	37	35	-5,41	-2,78
Ukupan broj zaposlenih	710	781	738	-5,51	3,94
Ukupan prihod od prodaje	64.593.448	64.614.503	72.211.549	11,76	11,79
Prihod od izvoza	19.412.609	23.102.245	23.106.445	0,02	19,03



KANTONALNA PRIVREDNA KOMORA TUZLA KOMORSKI INFORMATOR



FS 71622

Ukupna dobit	7.171.509	6.843.846	3.140.807	-54,11	-56,20
Motorna vozila, prikolice i poluprikolice	2019	2020	2021	2021/2020 (%)	2021/2019 (%)
Broj kompanija	7	7	7	0,00	0,00
Ukupan broj zaposlenih	710	695	731	5,18	2,96
Ukupan prihod od prodaje	98.679.339	79.481.452	105.595.340	32,86	7,01
Prihod od izvoza	2.564.043	2.777.963	5.242.009	88,70	104,44
Ukupna dobit	-319.600	-6.658.581	-579.903	n/a	n/a

TRGOVINA

Trgovina je jedna od najznačajnijih privrednih djelatnosti u Tuzlanskom kantonu s obzirom da zapošljava oko 17.000 osoba. Prosječna neto plaća je 697 KM i za 11,34% je veća u odnosu na prosječnu neto plaću u trgovini u 2020. godini. Trgovina je, uključujući trgovinu na veliko i na malo, osim trgovine automobilima, ostvarila ukupan prihod od prodaje od 3,3 milijarde KM, što je u odnosu na 2020.godinu rast od 15%.

Trgovina na veliko	2019	2020	2021	2021/2020 (%)	2021/2019 (%)
Broj kompanija	512	502	494	-1,59	-3,52
Ukupan broj zaposlenih	4.865	3.637	3.529	-2,97	-27,46
Ukupan prihod od prodaje	1.031.193.692	911.176.183	1.090.216.867	19,65	5,72
Prihod od izvoza	41.320.933	36.596.231	51.870.926	41,74	25,53
Ukupna dobit	59.756.088	58.343.131	88.408.195	51,53	47,95

Trgovina na veliko je u 2021. godini ostvarila prihod od prodaje 1,1 milijardu KM, što je 19,65% više od 2020.godine. Došlo je do pada broja zaposlenih za 3%. U trgovini na malo posluje 632 kompanije, koje upošljavaju 12.866 ljudi i ostvaruju ukupan prihod od prodaje 2,24 milijarde KM što je 12% više u odnosu na 2020.godinu.

Trgovina na malo	2019	2020	2021	2021/2020 (%)	2021/2019 (%)
Broj kompanija	639	643	632	-1,71	-1,10
Ukupan broj zaposlenih	12.656	12.714	12.866	1,20	1,66
Ukupan prihod od prodaje	2.038.338.678	1.985.625.325	2.241.783.931	12,90	9,98
Prihod od izvoza	20.230.360	22.405.882	21.333.124	-4,79	5,45
Ukupna dobit	134.321.824	119.323.350	142.885.888	19,75	6,38

UGOSTITELJSTVO I HOTELIJERSTVO

Turizam i ugostiteljstvo su i u 2020.godini trpili značajne posljedice pandemije korona virusa, kako zbog mjera kriznih štabova, ograničenja i zabrana rada, tako i otežanog kretanja i dolaska stranih posjetilaca u BiH. U 2021. godini došlo je do rasta dolazaka turista u Tuzlanski kanton od 78,2% i rasta broja noćenja za 75,2% u odnosu na 2020. Ostvareno je 70.651 noćenje od čega su 38.800 ostvarili domaći a 31.851 strani turisti. U Tuzlanskom kantonu registrovano je 19 kompanije koje se bave uslugama smještaja i zapošljavaju 126 ljudi. U odnosu na 2020. godinu, došlo je do rasta broja zaposlenih za 41,57% Hotelijerstvo je ostvarilo ukupan gubitak u 2021. godini u iznosu od 1,4 miliona KM. U djelatnosti ugostiteljstva su registrovane 75² kompanija koje upošljavaju 465 ljudi. Došlo je do pada broja zaposlenih od 16,8% u odnosu na prethodnu godinu. Prosječna plaća u djelatnosti hotelijerstva i ugostiteljstva (uključujući i obrte) je 538 KM, veća je za 2,09% ali je i dalje najniža od svih djelatnosti.

PRIJEVOZ

Djelatnošću cestovnog prijevoza robe i ljudi bavi se 339 kompanija koje upošljavaju 3.234 osobe. Ukupan prihod od prodaje je 181 milion KM i ukupna dobit ove djelatnosti je 30,8 miliona KM. U odnosu na 2020. godinu, djelatnost je ostvarila rast prihoda od prodaje 14,7% i rast ukupne dobiti od 23,8%.

Cestovni prijevoz robe i ljudi	2019	2020	2021	2021/2020 (%)	2021/2019 (%)
Broj kompanija	349	350	339	-3,14	-2,87
Ukupan broj zaposlenih	3.309	3.216	3.234	0,56	-2,27
Ukupan prihod od prodaje	413.163.678	384.598.536	441.205.201	14,72	6,79
Prihod od izvoza	165.022.698	154.747.195	181.182.012	17,08	9,79
Ukupna dobit	26.180.631	24.883.503	30.809.955	23,82	17,68

IT SEKTOR I ŠTAMPARSKA DJELATNOST

IT sektor (djelatnost računarskog programiranja i savjetovanja) bilježi kontinuiran rast te je u odnosu na 2020. došlo do rasta broja uposlenih za 22,4%, rasta prihoda od prodaje za 30,5%, prihoda od izvoza 20,3% i ukupne dobiti 17%.

Računarsko programiranje	2019	2020	2021	2021/2020 (%)	2021/2019 (%)
Broj kompanija	64	69	74	7,25	15,63
Ukupan broj zaposlenih	721	907	1.110	22,38	53,95
Ukupan prihod od prodaje	43.874.838	51.319.427	66.987.970	30,53	52,68
Prihod od izvoza	16.608.063	17.267.731	20.772.250	20,30	25,07
Ukupna dobit	6.259.658	7.391.700	8.651.339	17,04	38,21

Štamparska djelatnost	2019	2020	2021	2021/2020 (%)	2021/2019 (%)
Broj kompanija	24	25	24	-4,00	0,00
Ukupan broj zaposlenih	132	143	140	-2,10	6,06
Ukupan prihod od prodaje	8.962.862	8.412.921	9.123.802	8,45	1,80
Prihod od izvoza	1.905	0	19.031	n/a	899,00
Ukupna dobit	1.236.785	699.449	807.382	15,43	-34,72

KOMUNALNA DJELATNOST

U Tuzlanskom kantonu 67 kompanija se bavi komunalnom djelatnošću, uključujući i kompanije koje se bave snabdijevanjem plinom, toplotnom energijom i klimatizacijom². Zapošljavaju 1.684 osobe i ostvarile su ukupan prihod od prodaje 172,2 miliona KM. Došlo je do povećanja ukupnog prihoda od prodaje za 52% u odnosu na 2020. godinu. Ostvarena je ukupna dobit od 8,5 miliona KM.

1. U ovaj broj nisu uključeni ugostiteljski objekti koji su registrovani kao obrti (1675 obrta).
2. Podaci ne uključuju rezultate poslovanja JPEPBih – Termoelektrana Tuzla i Elektrodistribucija Tuzla



KANTONALNA PRIVREDNA KOMORA TUZLA KOMORSKI INFORMATOR



FS 71622

Privreda TK na sajmu u Banjaluci...

Održan 25. “Grames - Demi” Banjaluka

70 izlagača iz BiH i regiona – Predstavljene članice Kantonalne privredne komore Tuzla u okviru zajedničke izložbene postavke “Privreda TK”



Potpredsjednik Vlade Republike Srpske Srebrenka Golić otvorila je u Banjaluci 25. Međunarodni sajam građevinarstva i elektromašinske industrije “GRAMES-DEMI” koji je okupio 70 izlagača iz BiH i regiona. Golićeva, koja je i ministar za prostorno uređenje, građevinarstvo i ekologiju Republike Srpske, rekla je novinarima da prisustvo brojnih izlagača iz regiona pokazuje da je Srpska interesantan prostor za investicije. **“Očekujem da će tokom trajanja Sajma naši i privredni subjekti iz regiona sklopiti mnogo dobrih poslova i poslovnih aranžmana”**, istakla je Golićeva. Ona je navela da ova manifestacija okuplja i graditelje, proizvođače građevinskog materijala, mašina i mehanizacije, ali da je broj izlagača ove godine nešto manji zbog restriktivnih mjera u dijelu EU u vezi sa virusom korona, kao i situacije u Ukrajini. Golićeva je podsjetila da je građevinarstvo, kao jedan od privrednih zamajaca, pogođeno aktuelnim trendovima poskupljenja građevinskih materijala, ali da će Vlada Srpske nastojati da pomogne u smislu olakšavanja poslovanja graditeljima i domaćim proizvođačima građevinskog materijala, što je činila i tokom pandemije. Ona je dodala da će na Sajmu biti riječi i o zaštiti životne sredine, energetske efikasnosti i “utopljavanju” objekata, kao i o načinu prelaska na cirkularnu ekonomiju i obnovljive izvore energije, što je usko povezano sa građevinarstvom. Predsjednik Područne privredne komore Banjaluka Goran Račić rekao je da će, ukoliko se nastavi nepovoljna situacija uzrokovana ukrajinskom krizom, biti evidentan nedostatak određenih građevinskih materijala i sirovina, poput željeza, što pogađa i ovdašnje firme koje se bave preradom metala. **“Teško je predvidjeti šta će se dešavati, ali na nama je da ostanemo smireni, ne donosimo brzoplete odluke i pratimo razvoj situacije. U ovoj godini biće važno da se sačuvaju radna mjesta i domaća ekonomija”**, rekao je Račić. Ovaj sajam građevine, materijala opreme, alata i modernih tehnologija u građevinarstvu, kao i elektro i mašinske industrije, održavao se u prostorijama Banjalučkog velesajma od 16. do 19. marta. Otvaranju Sajma, koji je okupio izlagače iz Srpske, Federacije BiH, Hrvatske, Srbije i Slovenije, prisustvovali su i ministar trgovine i turizma Srpske Suzana Gašić, predstavnici grada Banjaluka, brojni privrednici i drugi.

Na 25. Međunarodnom sajmu građevinarstva i elektromašinske industrije “GRAMES-DEMI” u Banjaluci, prisustne su bile i firme članice Kantonalne privredne komore Tuzla u okviru zajedničke izložbene postavke pod nazivom “Privreda TK”. Zajedničku postavku u Banjaluci činili su: “Alpha smart energy” Tuzla, “Yavuz” Živinice, „Tehnograd company“ Tuzla, „Tuzla kvarc“ Tuzla, „Lović & CO“ Lukavac, „Radius“ Gračanica, „Wortman metal“ Tinja, „Bosfor“ Živinice i „Tehna“ Gračanica.

Najava sajamskih manifestacija...

Lukavac: Sajam “List” od 5. do 7. maja



Pozivamo Vas da budete dio 20. Međunarodnog sajma turizma i ekologije “LIST” od 5. do 7. maja 2022.god. u Lukavcu. U produžetku link na kome možete pogledati dio atmosfere sa ovogodišnjeg Sajma. Pokrovitelji sajma: Vlada Tuzlanskog kantona i Ministarstvo trgovine, turizma i saobraćaja Tuzlanskog kantona. Partneri sajma: Turistička zajednica Općine Lukavac i Turistička zajednica Tuzlanskog kantona.

Topli pozdrav iz Lukavca!

Za sve dodatne informacije stojimo Vam rado na usluzi.

Opširnije o sajmu i prijavi materijal na www.kpktz.ba



Gračanica: “GRAPOS-EXPO 2022” očekuje više od 300 izlagača



Na ovogodišnjem Međunarodnom sajmu poduzetništva i obrta “GRAPOS-EXPO 2022”, koji će od 17. do 20. maja biti održan u Gračanici, očekuje se više od 300 izlagača. Organizatori sajama, U.D. BOMS-expo d.o.o. Gračanica, potvrdili su za Fenu da će najviše biti zastupljen drvni i metalni sektor, te poljoprivredna i prehrambena industrija i turizam.

Ističu da će, osim domaćih, na sajmu izlagati i kompanije iz Austrije, Hrvatske, Njemačke, Srbije, i Turske. Partner ovogodišnjeg sajma je Hrvatska obrtnička komora. Organizatori navode da pauza zbog pandemije nije uticala na odziv za predstojeći sajam. To objašnjavaju činjenicom da upravo zbog nedostatka dešavanja privrednici i obrtnici imaju potrebu za promocijom,

razmjenom iskustva i uspostavljanjem novih partnerstava. Podsjećaju da je na posljednjem izdanju tog sajma, održanom 2019., izlagalo 380 kompanija iz pet zemalja. Sajam je te godine privukao oko 38.000 posjetilaca. Osim izlagačkog, sajam je sadržavao i konferencijski program, te je održano nekoliko panela i radionica posvećenih poduzetništvu, kao i B2B susreti. Više o sajmu, prijava za sajam na www.graposexpo.com.

Bihać: 19. sajam “Ekobis” 8. - 11. septembra

Međunarodni sajam ekologije – EKOBIS 2022, 19. po redu, održava se od 8. - 11. septembra 2022. godine u Bihaću. Svojim sadržajem i pratećim događajima sajam će biti posvećen temi H2-GORIVO BUDUĆNOSTI.

U okviru ovogodišnjeg sajma EKOBIS održat će se i 2. sajam turizma - ECOTOUR, te 2. sajam obrta.

Promotivni i prijavni materijali su već izrađeni, a uskoro će krenuti intenzivnija marketinška kampanja.

Generalni pokrovitelj ovogodišnjeg sajma je Vlada USK, suorganizator Grad Bihać, a partneri Ministarstvo vanjske trgovine i ekonomskih odnosa BiH, Federalno ministarstvo poljoprivrede, vodoprivrede i šumarstva, Vanjskotrgovinska/Spoljnotrgovinska komora BiH, Privredna/Gospodarska komore FBiH, JP Nacionalni park Una i Obrtnička komora USK.

Glavni medijski pokrovitelj sajma je RTV USK, a medijski partneri RTV Bihać, RSG Radio i akta.ba.



Sarajevo: 8. Sajam privrede. 8-11.12.



Zadovoljstvo je obavijestiti Vas da KJP Centar “Skenderija” - Sarajevski sajam organizuje 8. Sajam privrede, poljoprivrede i zanatstva & 45. Sajam roba široke potrošnje u terminu od 8. do 11. decembra 2022. godine. Pozivamo vas da budete sastavni dio zajedničke postavke privrede Tuzlanskog kantona na ovoj značajnoj međunarodnoj sajamskoj manifestaciji na kojoj Kantonalna privredna komora Tuzla organizuje i sufinansira zajednički nastup, zajedničku postavku “Privreda TK”, za svoje članice, bez dodatnih troškova izlagača. Pozivamo vas da prihvatite naš poziv i doprinesete uspješnom predstavljanju privrede Tuzlanskog kantona na svim sajamskim manifestacijama na kojima Kantonalna privredna komora Tuzla bude organizovala

zajednički nastup. Molimo da nam se javite za sve dodatne informacije, kontakt osoba je Dino Kalesić: 061/164-311.

Prijavni materijal na www.kpktz.ba

D.K.



Radionica u Komori...

“Sigurno rukovanje hranom i kako do oznaka geografskog porijekla i/ili halal certifikata”

Zajednička sjednica u proširenom sazivu Udruženja za trgovinu, ugostiteljstvo i turizam i Udruženja za poljoprivredu i prehrambenu industriju Kantonalne privredne komore Tuzla



U okviru redovnih aktivnosti a na osnovu Pravilnika o radu Udruženja za trgovinu, ugostiteljstvo i turizam i Udruženja za poljoprivredu i prehrambenu industriju Kantonalne privredne komore Tuzla, održana je zajednička sjednica odbora udruženja proširenom sazivu. Uz rasprave o aktuелnoj problematici oblasti trgovine, ugostiteljstva i turizma te poljoprivrede i prehrambene industrije na području Tuzlanskog kantona, centralni dio skupa bila je radionica pod nazivom “Sigurno rukovanje hranom i kako do oznaka geografskog porijekla i/ili halal certifikata”. Riječ je o projektu USAID Razvoj održivog turizma u BiH (Turizam) u partnerstvu sa Agencijom za sigurnost hrane Bosne i Hercegovine.

Velibor Trifković stručnjak za turističke proizvode - USAID Turizam projekt, u uvodnom je dijelu napravio predstavljanje projekta i vodiča: **“Bila je ovo dobra prilika da se upoznam sa kvalitetnim projektom USAID Turizam akademije i online kurseva. Ujedno, mislim da je od velike koristi za sve nas koji se bavimo turizmom, ugostiteljstvom, proizvodnjom hrane, sve ono što je sačinjavalo prezentaciju Vodiča za sigurno rukovanje hranom u sektoru ugostiteljstva i avanturističkog turizma te Vodiča za dobijanje oznaka geografskog porijekla i tradicionalnih specijaliteti hrane u BiH. Izvanredan skup, zahvaljujemo na izuzetno korisnim informacijama koje smo dobili u toku radionice u Komori”**, rekao je Kasim Selimović predsjednik Odbora udruženja za trgovinu, ugostiteljstvo i turizam Kantonalne privredne komore Tuzla.

Učesnicima skupa je rečeno kako je projekt USAID Razvoj održivog turizma u BiH (Turizam) u partnerstvu sa Agencijom za sigurnost hrane Bosne i Hercegovine u proteklom periodu razvio dva vodiča: Vodič za sigurno rukovanje hranom u sektoru ugostiteljstva i avanturističkog turizma i Vodič za dobijanje oznaka geografskog porijekla i tradicionalnih specijaliteti hrane u BiH.

Podizanje svijesti o važnosti postupaka sigurnog rukovanja hranom u ugostiteljskim i turističkim objektima svrha je vodiča za sigurno rukovanje hranom. Uvođenjem i primjenom ovog vodiča, i pridržavajući se preporuka navedenih u ovom vodiču, subjekti u poslovanju s hranom će izbjeći neželjena iskustva i zdravstvene rizike koji mogu biti prouzrokovani neadekvatnim rukovanjem, pripremom i čuvanjem hrane.

Sa druge strane, zaštita proizvoda preko geografskih oznaka jedan je od ključnih koraka naprijed za poljoprivredne proizvođače kako bi stekli odgovarajuću tržišnu prednost. Geografske oznake stoga mogu igrati značajnu komercijalnu ulogu na tržištu i predstavljati interesantan tržišni potencijal za poljoprivredne proizvođače u smislu brendiranja proizvoda i promocije geografskog područja sa kojeg proizvod sa zaštićenom oznakom dolazi.

Pored navedenog, Agencija za certificiranje HALAL kvalitete Bosne i Hercegovine predstavice svim prisutnim i svoj Vodič i procedure kada je u pitanju HALAL certificiranje privrednim subjektima.

Radionica je namijenjena pružaocima ugostiteljskih usluga (restoranima, hotelima i drugim subjektima koji se bave pripremom i posluživanjem hrane) kao i poljoprivrednim proizvođačima (Udruženjima, zadrugama, firmama itd.) čiji prehrambeni proizvodi imaju potencijal za dobijanje jedne od registrovanih oznaka porijekla i/ili Halal certifikat.

Na skupu je Vodič, procedure, prednosti i faktori uspjeha implementacije HALAL standarda, predstavio Valdet Peštalić šef odjela za edukaciju Agencije za certificiranje Halal kvalitete BiH.

Radionica je organizovana u suradnji i uz podršku Kantonalne privredne Komore Tuzla.

D.K.



Javni poziv za usavršavanje...

Usavršavanje za NO i UO, prijave za novu grupu

Javni poziv za dostavljanje prijava



Kantonalna privredna komora Tuzla prikuplja prijave za novu grupu za Usavršavanje predsjednika i članova nadzornih odbora i uprava privrednih društava sa učešćem državnog kapitala (prema Uredbi Vlade FBiH, "Službene novine F BiH", br. 71/09, 33/10, 23/11, 83/11, 2/13, 80/13, 48/15, 60/16 i 88/17). Početak edukacije je planiran za po formiranja grupe, a u zavisnosti od epidemiološke situacije, organizovat će se u prostorijama Komore u Tuzli ili online putem Zoom platforme, o čemu će odluka biti donesena neposredno pred početak.

Zainteresovani kandidati prijavu mogu izvršiti dostavom prijavnog upitnika (na web stranici Komore: www.kpktz.ba).

Potrebna dokumentacija:

1. prijavni upitnik
2. kopija diplome
3. uvjerenje o radnom iskustvu u struci

Cijena usavršavanja (edukacija, literatura, ispit i certifikacija) je 880,00 KM po polazniku, a informacije o rokovima i načinu uplate bit će Vam dostavljene nakon određivanja datuma početka. Prijave i sve dodatne informacije na mail: edina@kpktz.ba ili putem faks na broj 035/369-552 ili poštom na adresu Trg slobode bb, 75000 Tuzla.

Kantonalna privredna komora Tuzla
Trg slobode bb, 75 000 Tuzla.

Rok za podnošenje prijava kao i tačan termin početka usavršavanja, biće naknadno utvrđeni, po formiranju nove grupe polaznika.

Upitnik na: <http://kpktz.ba/index.php/vijesti/1601-usavrsavanje-za-no-i-uo-prijave-za-novu-grupu>



Iz firme članica Komore...

"AgroLife" Mionica – prepoznatljivi po kvalitetu

Ministar Begić posjetio "AgroLife" u Mionici



Ministar poljoprivrede, šumarstva i vodoprivrede Tuzlanskog kantona Emir Begić posjetio je danas kompaniju "AgroLife" d.o.o. u Mionici kod Gradačca, koja posluje u oblasti proizvodnje komposta za uzgoj šampinjona.

Nastala iz porodičnog biznisa kojim se uspješno bavila od 1991. godine, "AgroLife" već deceniju posluje na teritoriji Bosne i Hercegovine proizvodeći pasterizirani supstrat (kompost), pokrovni materijal, zaštitna sredstva namijenjena uzgoju gljiva, ambalažu za pakovanje i mjerne instrumente za uzgoj gljiva.

Prema riječima ministra Begića, ono što je domaćin Senad Hećimović pokazao nadmašilo je sva očekivanja. **„Posebno me raduje što je ovdje gotovo stopostotno učešće našeg domaćeg proizvoda, jer se ovdje kao ulazne sirovine koriste nus-proizvodi u ostaloj poljoprivrednoj proizvodnji. Pšenična slama, nusproizvod sa farme pilića i jedino što se uvozi je micelij”,** prenio je ministar Begić svoje dojmove nakon obilaska farme.

Cilj „AgroLife”, rečeno je ovom prilikom, jeste da bude prepoznatljiva kompanija po kvalitetu proizvoda i zadovolji potrebe kupaca, implementira najnovije tehnološke inovacije i vodi sigurno orijentisanu proizvodnju u skladu sa standardima koje posjeduje.

Prema riječima vlasnika kompanije Hećimovića, bh-proizvođači su sa našeg tržišta već istisnuli sav uvoz gljiva ali je potrebno ići sa modernizacijom ove vrste proizvodnje, budući da sve zemlje u okruženju imaju moderniju proizvodnju.

Ministar Begić kazao je da će resorno ministarstvo zajedno sa Grupacijom poljoprivrednih proizvođača pri Privrednoj komori Tuzla učiniti sve da se napravi iskorak ka modernijoj proizvodnji u ovoj oblasti.

Zajedničkim angažmanom do većih količina mlijeka na tržištu

Ministar Begić posjetio „Mliječnu industriju 99” d.o.o. u Gradačcu

Kako bi dobio potpunu sliku kada je u pitanju proizvodnja mlijeka ministar poljoprivrede, šumarstva i vodoprivrede Tuzlanskog kantona Emir Begić posjetio je „Mliječnu industriju 99” d.o.o. u Gradačcu.

Nakon iskustava koje su sa njim podijelili vlasnici farmi muznih krava resorni ministar posjetio je domaću mljekaru koja otkupljuje značajne količine mlijeka od poljoprivrednih proizvođača sa TK.



„Došli smo da vidimo na koji način rade i koliko su oni opterećeni situacijom zajedno sa našim poljoprivrednim proizvođačima i da im još jednom ukažemo na potrebu da i oni, na neki način, imaju u vidu i probleme sa kojima se susreću poljoprivredni proizvođači. Ako te probleme ne riješimo svi zajedno, danas-sutra će se i mljekara naći u istim ovim problemima”, kazao je ministar Begić.

Uvidjevši da najmodernija mljekara u BiH ima veći kapacitet kada je u pitanju prerada mlijeka, ministar Begić je naglasio da će se Ministarstvo poljoprivrede, šumarstva i vodoprivrede TKu narednom periodu maksimalno angažovati zajedno sa poljoprivrednim proizvođačima kako bi se povećala proizvodnja sirovog mlijeka na području TK.

„Potrebno je da ova i sve druge mljekare na području TK maksimalno iskoriste svoje kapacitete, budući da već imaju svoje mjesto na tržištu a sigurno je da mogu plasirati mnogo veće količine mlijeka”, kazao je ministar Begić.

D.K.



Iz firme članica Komore...

“Sisecam Soda” Lukavac „živi sa svojim okruženjem“

Osigurati uslove za kvalitetniji rad i brži razvoj Sode Sisecam i svih privrednih društava



„Vlada Tuzlanskog kantona će svojim djelovanjem nastojati da osigura uslove za kvalitetniji rad i brži razvoj svih privrednih društava, među kojima Soda Sisecam zauzima posebno mjesto“, kazao je premijer Tuzlanskog kantona Irfan Halilagić, tokom sastanka delegacija Kantonalne vlade i Uprave Sode Sisecam. Naime, kako je dalje rečeno, s obzirom na trenutnu situaciju i kretanja, kako na lokalnom, tako i na globalnom tržištu, Vlada saradnju sa svim privrednim subjektima u Tuzlanskom kantonu drži visoko na listi prioriteta. Pokazatelj takvog odnosa je i činjenica da je sastanak organiziran odmah po zahtjevu Uprave Sode Sisecam. Imajući u vidu opredjeljenje i spremnost Vlade da pomogne razvoj privrede, Uprava Sode Sisecam je izrazila svoje zadovoljstvo, te je kao društveno odgovorna kompanija, koja prema riječima direktora Ozdemira, „živi sa svojim okruženjem“, izrazila svoju spremnost da pomogne projekte posebno u obrazovnom sektoru u Tuzlanskom kantonu, a posebno oblasti obrazovanja kadrova hemijske

struke. Tokom sastanka generalni direktor Sode Mehmet Tekin Ozdemir je kazao da Soda ima stranog investitora, ali je ona bosanskohercegovačka kompanija koja dominantno koristi domaće sirovine i domaću radnu snagu, a svoj proizvod plasira na inostrana tržišta. Delegacija Vlade se zahvalila Sodi Sisecam na dosadašnjoj saradnji, te izrazila spremnost da u okviru posebnih radnih sastanaka, intenzivnom komunikacijom sa Sodom, ali i drugim privrednicima s jedne strane radi na stvaranju ambijenta za njihov dalji razvoj, ali i da ih, s druge strane, uključi u implementaciju društvenih aktivnosti u zajednici u kojoj privredna društva egzistiraju. Osim premijera Halilagića i ministra Durakovića sastanku su u ime Vlade TK prisustvovali i ministrica prostornog uređenja i zaštite okolice Anela Ajšić i ministar poljoprivrede, šumarstva i vodoprivrede Emir Begić sa saradnicima, a uz direktora Ozdemira, u ime Uprave Sode Sisecam sastanku su prisustvovali izvršni direktori Nihad Akeljić i Mirsad Husić.

Vlada FBiH će ove godine za Aerodrom Tuzla izdvojiti 2 miliona KM

Federalni premijer Novalić i ministar Ramić u radnoj posjeti Tuzlanskom kantonu



Premijer Federacije BiH Fadil Novalić, federalni ministar raseljenih osoba i izbjeglica Edin Ramić i v.d. direktora JP Autoceste FBiH Elmedin Voloder boravili su u radnoj posjeti Vladi Tuzlanskog kantona. Sastanku je prisustvovao i predsjedavajući Skupštine Tuzlanskog kantona Žarko Vujović. Tema razgovora bile su kapitalne investicije, koje će biti usmjerene ka Međunarodnom aerodromu Tuzla, zatim saobraćajna infrastruktura, izgradnja autoceste, brzih cesta i rekonstrukcija postojećih magistralnih puteva, kao i projekti od važnosti za razvoj Tuzlanskog kantona. „Razgovarali smo o direktnoj podršci zajedničkim projektima vlada Tuzlanskog kantona i Federacije BiH. Bilo je riječi o zdravlju, gdje ćemo kroz novi zakon o konsolidaciji obuhvatiti bolnicu Gračanica

i Univerzitetski klinički centar Tuzla. Zatim Aerodromu Tuzla, koji ćemo nastaviti finansirati i ove godine sa dva miliona KM“, kazao je Novalić. Dodao je da je regionalni put Žepče – Zavidovići – Banovići – Živinice, pa sve do Međaša kod Kalesije, pre kategorisan u magistralni i kao takav je prioritet, a naročito trasa od Živinica do tuzlanskog aerodroma. „Dobili smo garancije premijera Novalića da će određene kapitalne investicije biti usmjerene ka Međunarodnom aerodromu Tuzla. Već je pokrenuta izgradnja trećeg gatea i uređenje parkinga na aerodromu. Razgovarali smo o potrebi za rješavanjem pitanja trenutne problematike na Univerzitetskom kliničkom centru Tuzla, te potpisivanju jednog zajedničkog ugovora koji će regulisati imenovanje Upravnog odbora“, rekao je premijer TK Irfan Halilagić. Na sastanku se razgovaralo i o udruživanju sredstava za rekonstrukciju regionalnih puteva i za pomoć povratnicima, kao i o podršci Vlade FBiH za ovu i narednu godinu.

D.K.



Jačanje putne infrastrukture...

Puna podrška Vlade Tuzlanskog kantona

Ubrzati aktivnosti u cilju što skorijeg početka radova na izgradnji autoceste Tuzla - Orašje



„Vlada Tuzlanskog kantona, u cjelokupnom svom mandatu, stoji na dispoziciji da pomogne provođenje svih neophodnih koraka kako bi se što prije počelo sa konkretnim radovima na izgradnji autoceste Tuzla – Brčko – Orašje“, rečeno je na sastanku premijera Tuzlanskog kantona Irfana Halilagića i ministra trgovine, turizma i saobraćaja Mustafe Šakića sa izvršnim direktorom JP Autoceste FBiH za projektovanje i građenje Ešefom Džafićem. Sastanak je iskorišten kako bi se Vlada detaljnije upoznala sa trenutnim aktivnostima na realizaciji ovog generacijskog projekta, kao i svim što je realizirano u prethodnom periodu. „Ovo je naš generacijski projekat i veoma nam je bitno da prvi radovi na geološkim istraživanjima na prvoj dionici započnu što prije. U tom smislu Vlada, resorna ministarstva i ja lično stojimo na dispoziciji Autocestama FBiH, da pomognemo u svemu onome što bude u našoj moći. U tom pogledu garantiramo da će svako postupanje, koje bude u nadležnosti Tuzlanskog kantona, imati prioritet u postupanju i da se niti na jednu našu aktivnost neće čekati duže od stvarno neophodnog vremena“, kazao je premijer Halilagić. Direktor Džafić je premijeru prezentirao da sve dosadašnje aktivnosti teku predviđenom dinamikom, te da se polovinom ove godine očekuje i da Posavski kanton i Brčko Distrikt urade svoju prostorno – plansku dokumentaciju, kako bi se moglo početi i sa projektiranjem autoceste na ovom području. „Dok to čekamo, aktivnosti na dionici koja ide kroz Tuzlanski kanton idu svojim tokom i uskoro očekujemo evaluaciju ponuda koje su pristigle po tenderu za izradu Glavnog projekta dionice od Tuzle do Previla“, kazao je Džafić. Sastanku je prisustvovao i pomoćnik ministra za saobraćaj Nenad Lukanović.

Rekonstrukcija regionalne putne mreže

Analiza trenutnih i najava novih projekata na rekonstrukciji putne infrastrukture



Realizacija aktualnih projekata na rekonstrukciji regionalne putne mreže bila je tema sastanka premijera Tuzlanskog kantona sa direktorom JU Direkcija regionalnih cesta TK Zijadom Omerčićem. Prema riječima direktora Omerčića, Direkcija se uz želje da realizira sve planirane aktivnosti u posljednje vrijeme, zbog rasta cijena građevinskih radova na tržištu susreće sa brojnim problemima. S tim u vezi za očekivati je da će u narednom periodu biti neophodno raditi izmjene i dopune planskih dokumenata, kako bi se oni prilagodili novonastaloj situaciji. Također je istaknut i problem neažurnog rješavanja imovinsko – pravnih odnosa od strane gradskih i općinskih službi, a što predstavlja



značajan problem u realizaciji projekata rekonstrukcije putne infrastrukture. S tim u vezi zaključeno je da će u onim slučajevima gdje problemi imovinsko – pravne prirode ne budu pravovremeno rješavani, Direkcija vršiti relokaciju predviđenih sredstava za te projekte na realizaciju onih projekata kod kojih imovinsko – pravna pitanja budu na vrijeme rješavana. Također je bilo govora i o intencijama Vlade Tuzlanskog kantona da budžetskim sredstvima pomogne sanaciju i lokalne putne mreže u gradovima i općinama u Tuzlanskom kantonu. „Iako su za ovu namjenu u budžetu već planirana sredstva u iznosu od 1,8 miliona KM, dogovorili smo se da kroz rebalans Budžeta, koji pripremamo predvidimo i dodatna 2 miliona KM za ove namjene. Bit će to naša pomoć lokalnim zajednicama za sanaciju lokalnih puteva“, najavio je premijer Halilagić. Uz sve navedeno je razgovarano i o projektima putne debljake Tuzlanskog kantona, što su projekti koje primarno, uz Vladu Federacije BiH, realiziraju JP Ceste FBiH i JP Autoceste FBiH. U tom smislu je izražena volja i spremnost da se u cjelokupnom kapacitetu JU Direkcija regionalnih cesta TK pomogne u realizaciji ovih značajnih infrastrukturnih projekata. U tom pogledu najavljeno je i skoro održavanje sastanka svih faktora relevantnih za realizaciju ovih projekata, kako bi se njihova realizacija dodatno ubrzala i intenzivirala. Sastanku su uz premijera Halilagića i direktora Omerčića, prisustvovali i pomoćnik ministra za saobraćaj Nenad Lukanović i savjetnik za ekonomsko – finansijske poslove u Direkciji regionalnih cesta Zemira Beširović.

Razgovor o projektima modernizacije željezničkog saobraćaja

Sastanak sa menadžmentom Željeznica Federacije Bosne i Hercegovine



U cilju poduzimanja aktivnosti na projektima vezanim za željeznički saobraćaj na području Tuzlanskog kantona, koji bi trebali biti realizirani u narednom periodu održan je sastanak sa menadžmentom Željeznica Federacije Bosne i Hercegovine. Iniciran od strane Ministarstva trgovine, turizma i saobraćaja TK, sastanak je imao fokus na završetku procesa elektrifikacije glavnih željezničkih pruga u zemlji, koji je prekinut prije 30 godina. „Strateški projekat za Tuzlanski kanton je elektrifikacija pruga Doboj – Tuzla u dužini od 57,60 (km), Brčko – Banovići u dužini od 87,30 (km) i Živinice – Zvornik u dužini od 44,90 (km)“, rečeno je ovom prilikom, te naglašeno da su u svrhu realizacije projekta već počeli razgovori između Vlade FBiH i Vlade RS. Također je istaknuto da bi realizacijom projekata bili smanjeni transportni troškovi, usklađen razvoj saobraćaja i privrede te uspostavljen moderan putnički saobraćaj prema najmnogoljudnijem kantonu (talgo vozovima). Kao benefiti ističu se i smanjenja vremena putovanja putnika i tranzita tereta, zagađenja zraka i tla u regionu i potrošnje goriva potrebnog za vuču vozova, naglasili su predstavnici resornog ministarstva TK. Na sastanku je također bilo riječi i o efektima elektrifikacije koji bi se prvenstveno ogledali u smanjenju troškova transporta. Specifični troškovi dizel- vuče su dva do tri puta veći od troškova elektro-vučne, rečeno je uz naglasak da BiH proizvodi dovoljne količine električne energije a budući da je nafta iz uvoza, to nas nesumnjivo opredjeljuje za elektrifikaciju. Predstavnici resornog ministarstva kazali su da su na području TK veliki komitenti za koje je željeznica u stanju osigurati masovni transport (rudnici uglja, termoelektrana, GIKIL i dr.). Drugi kapitalni projekat, o kojem je ovom prilikom bilo riječi, je izgradnja željezničke pruge Vareš - Banovići - Živinice (krak do Međunarodnog aerodroma Tuzla). S ciljem realizacije navedenog projekta Željeznice FBiH ponovno su raspisale tender za izradu Studije opravdanosti izgradnje ove pruge i Idejnog rješenja, kao prvog, neophodnog koraka u realizaciji ovog kapitalnog infrastrukturnog projekta, rečeno je na sastanku. Sastanku su prisustvovali ministar trgovine turizma i saobraćaja TK Mustafa Šakić i pomoćnik ministra za saobraćaj Nenad Lukanović, a Željeznice Federacije BiH predstavljali su generalni direktor Enis Džafić, izvršni direktor za poslove željezničke infrastrukture Mario Kozina i direktor sektora elektrotehničke djelatnosti Mustafa Kubat.

D.K.



Prvi mjesec nove Vlade Tuzlanskog kantona...

Od ukupno 18, u prvom mjesecu Vlada u potpunosti realizirala 5 mjera

Vlada pokazala i demonstrirala upravo one odrednice koje se od nje očekuju, dinamičnost, energičnost, pravovremenost i odlučnost u djelovanju i odlučivanju



Povodom prvog mjeseca mandata, premijer Tuzlanskog kantona Irfan Halilagić je sa članovima Vlade Tuzlanskog kantona upriličio konferenciju za medije. Kako je istaknuo „prilikom imenovanja sam rekao da nova Vlada Tuzlanskog kantona preuzima odgovornost 8 mjeseci prije izbora što svakako nije izgovor niti alibi. Naprotiv to je dodatni motiv svima nama da realiziramo naše programske ciljeve i načinimo iskorake u svakoj sferi društvenog života po kojima ćemo biti prepoznatljivi“.

Prvi rezultati našeg rada pokazuju da smo na dobrom putu, rečeno je.

„Smatramo da je ova vlada pokazala i demonstrirala upravo one odrednice koje se od nje očekuju, dinamičnost, energičnost, pravovremenost i odlučnost u djelovanju i odlučivanju. Skupštinska većina definisala je 18 mjera kao dio koalicionog sporazuma i te su mjere postale sastavni dio ekspozea premijera, koje ćemo nastojati da realiziramo u ovih 8 mjeseci“, kazao je premijer Halilagić ističući da je koncipiran i tzv. „Ekspozimetar“, kao mjerni instrument uspjeha realizacije obećanih mjera. gdje tačno pratimo realizaciju naših obećanja.

„S ponosom mogu reći da smo, od njih 18, 5 mjera već u potpunosti realizirali, a da smo u većini preostalih već značajno odmakli na način da smo donijeli potrebne propise (zakone) ili smo osigurali sredstva za njihovu realizaciju. Realizaciju navedenih očekujemo nakon rebalansa Budžeta TK koji ćemo vrlo brzo uputiti u Skupštinsku proceduru“, kazao je premijer Halilagić.

„Već na samoj sjednici Skupštine ukinuli smo povećanje plaća izabranim zvaničnicima. S ciljem uvođenja elektronske zdravstvene knjižice, ali i brojnih drugih pogodnosti za građane i pacijente, potpisali smo Ugovor za nabavku softvera za potrebe integrisanog zdravstvenog informacionog sistema zdravstvenih ustanova i Zavoda zdravstvenog osiguranja TK i nadogradnje postojećeg sistema. Povećali smo visinu osnove za obračun novčane

egzistencijalne naknade za demobilisane borbe. Povećali smo iznose dječijeg dodatka. Za svaku majku porodiću bez obzira na status, osigurali smo mjesečni iznos od 1000 KM, a najduže do 12 mjeseci. Povećali smo mjesečni iznos naknade za nabavku posebne hrane oboljelim od celijakije, te stvorili preduslove za stipendiranje nadarenih učenika i studenata“, nabrojao je ukratko do sada realizirane mjere premijer Halilagić.



Gledano statistički, za ovaj mjesec Vlada je održala ukupno 10 sjednica na kojima je razmatrano ukupno oko 120 tačaka dnevnog reda, sa oko 150 mjera, među kojima se nalazilo i 6 zakonskih rješenja.

Osim prezentacije realiziranih mjera, Vlada je na konferenciji za medije prezentirala i druge aktivnosti koje su realizirane tokom proteklih 30-tak dana, a koje nisu bile u fokusu javnosti. Na kraju konferencije premijer Halilagić je najavio da će ovakve konferencije biti pravilo u radu Vlade, te izrazio očekivanje da će takav odnos, osim povećanja efikasnosti doprinijeti i do povećanja stepena transparentnosti rada Kantonalne vlade.

Odjeljenje za informisanje
Vlade Tuzlanskog kantona



Saradnja vlada TK i FBiH...

Radna posjeta Vlade FBiH Tuzlanskom kantonu

Dodatno intenzivirati aktivnosti na zajedničkim projektima TK i FBiH



Premijer Federacije BiH Fadil Novalić boravio je, sa svojim saradnicima, u radnoj posjeti Tuzlanskom kantonu. Na sastanku sa premijerom Tuzlanskog kantona Irfanom Halilagićem i ministrima u Kantonalnoj vladi potvrđeno zajedničko opredjeljenje da se nastavi, ali i da se dodatno intenziviraju aktivnosti na zajedničkim projektima federalnog i kantonalnog nivoa vlasti. Prije svega se razgovaralo o saobraćajnoj deblokadi Tuzlanskog kantona odnosno projektima izgradnje autoceste i brzih cesta, te rekonstrukcije postojećih magistralnih cesta na području Tuzlanskog kantona.

„Izrazili smo volju i spremnost da u okvirima mogućnosti uložimo maksimalne napore, a sve u cilju da određene aktivnosti realiziramo što prije. Također, ukazali smo na potrebu rješavanja pitanja i problematike koja se veže uz UKC- Tuzla. To se prije svega odnosi na usklađivanje njegovog poslovanja sa zakonom, odnosno usaglašavanje u pogledu osnivačkih prava koja nad UKC-om Tuzlanski kanton dijeli sa Federacijom BiH”, kazao je premijer Halilagić.

Tokom sastanka premijer Novalić je iznio i određene garancije da će Vlada FBiH osigurati određena finansijska sredstva za realizaciju kapitalnih investicija na Međunarodnom aerodromu Tuzla, a kako bi se Aerodrom učinio efikasnijim. Sastanku je prisustvovao i v.d. direktora JP Autoceste FBiH Elmedin Voloder, te je sastanak bio prilika i da se vidi pomak u pogledu projektiranja i pripreme za izgradnju autoceste Tuzla – Brčko – Orašje u odnosu na raniji sastanak.



„Osim izgradnje autoceste i modernizacije željezničkog i ostalog drumskog saobraćaja u TK, danas smo razgovarali i o drugim temama koje se odnose na direktnu konzumaciju sredstava tamo gdje postoje dodirne tačke Kantonalne i Federalne vlade. Zbog toga smo razgovarali o zdravlju i implementaciji novog Zakona o konsolidaciji zdravstva. Također, Vlada Federacije će i ove godine, u skladu sa našim mogućnostima sa 2 miliona KM pomoći realizaciju kapitalnih projekata na Međunarodnom aerodromu Tuzla. Uz održavanje i modernizaciju ceste koja od Živinica vodi prema aerodromu, rekonstrukciju i modernizaciju parkinga na Aerodromu želimo stvoriti sliku Aerodroma kakvu on zaista zaslužuje”, kazao je danas premijer Novalić.

Osim navedenog, a imajući u vidu i prisustvo ministra raseljenih osoba i izbjeglica FBiH Edina Ramića, pažnja je posvećena i realizaciji zajedničkih aktivnosti s ciljem poboljšanja uslova života povratnika, ali i o očekivanom kretanju Budžeta Tuzlanskog kantona imajući u vidu potpore od Vlade Federacije u ovoj i narednoj godini. Sastanku je uz premijera Halilagića i kantonalne ministre prisustvovao i predsjednik Skupštine TK Žarko Vujović, dok je uz premijera Novalića, federalnog ministra Ramića i direktora Volodera, u ime Vlade FBiH sastanku prisustvovalo i savjetnik federalnog premijera Goran Mirašić, te izvršni direktor JP Autoceste FBiH Ešef Džafić.

D.K.



Iz firme članice Komore...

„Maestro Suits“ brend firme „Kismet „ d.o.o

Grupa od tri srodne firme - 200 zaposlenih - Razvoj vlastitog brenda „Maestro Suits“ - Prodavnice u Brijesnici Maloj i Sarajevu



Firma „Kismet“ kao proizvođač tekstilne industrije egzistira od 1994. godine kao porodična firma specijalizirana za izradu radne i zaštitne opreme a prekretnica u proizvodnji modne konfekcije desila se tri godine poslije ugovoranjem posla sa firmom „New GOL“ iz Njemačke, kada se oformila, specijalizirala i dugi niz godina uspješno proizvodila linija dječije klasične modne konfekcije. Rast i razvoj firme, kao i tehnološki napredak te rast posla rezultiralo je formiranjem partnerstva 2006. godine između „Kismet“ doo i „Vogl Konfektion“, poznat kao „Vokal productions“ koji se specijalizirao za proizvodnju skijaških odijela. Da bismo zadovoljili potrebe i zahtjeve tekstilne industrije, „Kismet „ d.o.o ide korak dalje i 2012. godine osniva tekstilno tehnološki centar „TTC“ sa modernom Gerber CAD/CAM opremom. Današnji biznis možemo opisati kao grupu od tri srodne firme, koju čine cca 200 zaposlenih. Proizvodne linije možemo jako brzo preobraziti u ovisnosti od potrebe različitih artikala jer je naša proizvodnja jako fleksibilna.

U tri proizvodne linije proizvodimo hlače, blejzere, mantile, narodne haljine, suknje, košulje i u nazad tri godine muška modna odijela na koja smo veoma ponosni.

Ova firma je dugi niz godina bila proizvođač za različite kupce u inozemstvu i koncept rada zasnivao se isključivo na izvozu. Naša tiha želja je uvijek je bila izraditi vlastiti proizvod i to upravo moderno muško odijelo koje je lako nosivo, praktično i elegantno rješenje za razne prilike. Sretni smo jer je i ta priča počela da se dešava zahvaljujući našoj uspostavljenoj saradnji i napretku u tehnološkom smislu, te razvoju na kojem je firma „Kismet „ radila gotovo dvije godine. Uspjeli smo zahvaljujući našim italijaskim partnerima, najačim svjetskim brendovima uspostaviti saradnju i proizvesti muško odijelo po italijaskoj tehnologiji izrade. Iza nas su velika ulaganje u tehnološkom smislu jer je razvoj i izrada muškog odijela izuzetno zahtjevan i dugotrajan proces, ali smo sretni i ponosni što danas možemo reći da imamo ugovore sa najačim svjetskim brendovima muških odijela izrađenih po italijanskoj tehnologiji, ali i da paralelno i konstantno radimo na razvoju vlastitog brenda

„Maestro Suits“. U našim dvjema prodavnicama, u Brijesnici Maloj u krugu fabrike te u Sarajevu na adresi Čobanija 1, danas možete pronaći široku paletu izbora najfinijih vuninih tkanina za izradu muških i ženskih odijela, košulja a u međuvremenu smo razvili i vlastitu proizvodnju kravate od najfinije svile.

Filozofija brenda Maestro Suits je osim kvaliteta, fitting je stavila na prvo mjesto. Osim velikog broja odijela u ponudi, kupci imaju mogućnost prepravke odijela na licu mjesta i šivenje odijela po mjeri, kako bi svaki kupac dobio odijelo kakvo želi. Specifičnost ovog brenda je u kreiranju odijela po italijaskoj tehnologiji uz najkvalitetnije vunene tkanine. Sva Maestro Suits odijela su izrađena od kvalitetnih tkanina italijaskih proizvođača, poput Rede i Vitale Barberis Canonico /VBC/ koji dostižu finoću i do 160 S. Italijanski krojevi su simbol za stil i eleganciju, te su primjer majstorstva i spajanja umjetničke tradicije sa modernim tehnologijama.


Osim hiljade komada odijela na jednom mjestu, u našim radnjama možete pronaći više stotina komada košulja, sakoa, kravata, leptir mašni, kožnih torbi i nesesera, kajševa, novčanika i drugih modnih dodataka.



„Kismet „ d.o.o



THE CHAMBER OF ECONOMY OF TUZLA CANTON



TUZLA CANTON

Your Business Partner

